

Bonkand'ona

Mako

Tshapita 1

1 Angolelo enda bosako bond'olotshi bonda Yeso Kilisito, Bosoka Ndjambi. 2 Shen'ek'iyo akotaka nda benkanda benda basangi mbo; Lophalaka, nshosokola ekima enami nd'oso onda elongi endawe; andi aokophonga mboka endawe. 3 Lophoso londa bonto boyadi diphaphangwaka nd'oswe mbo, Lophongaka bosese bona Nkumu; losolonganyaka mboka inandi.

4 Yoane oyakaki diyobatis'anto nd'etetenyi enda boshwe; andi ondasangelaki mbo, Lokadimolak'etema eninyo inda bembe beninyo bephophyami. 5 Banto bya andulamaki nda iyekele inda Yudiya la Yelusalema andolaki l'iyo akendaki el'andi. Andi ondabatisaki na ntandu enda Yolodana nda yishola bembe bendiyo. 6 Yoane aolota etoo enda yosa enda kamelo, aolemba bosengi onda lophoso nda bonkeki; and'oleki yondjo la besanga benda bonkonda. 7 And'osambedyaki banto mbo; Bondoyoyi m'okongo onami aondekola mpamba. Emi lako l'olotshi bonda dishunama la dilembola bekuru benda sabata inandi. 8 Emi nsholobatisa la ashi, aye andi aokolobatisa la Nyuma end'Olotshi.

9 Nda betsho beiko aoyala shene; Yeso oyakaki ma Nasaleta ena Ngalili, l'aoyobatisama ele Yoane nda Yolodana. 10 Ko akiandi wolaka m'ashi andi onenaki loola lodipholama, la Nyuma shena mpuru en'emenga ondokitelaki; 11 lolaka lotephelama ma loola mbo, We ondoyadi Bona bonami bondok'emi lolango; la we onshashadya bolotshi.

12 Ko Nyuma ondosokolaki phwaphwa nda boswe bona mpampa. 13 Andi oki mpiko nda boswe betsho benkama benei, aokutshama ele Satana; andi oki nd'atei ana nyama inda yale, la bandjelo andokambelaki bolimo.

14 Aye nd'okongo aki Yoane akanemaka, Yeso oyakaki na Ngalili nda disambedyaka banto bosako ond'olotshi bona Ndjambi mbo; 15 Ekeki embokoka, waphemelo ona Ndjambi bokoka; lonyolaka betema, limedyaka bosako bond'olotshi.

16 Akiandi alekaka nda bompandje bonda iyeke ina Ngalili, andi aolena Simona la Andele, bona nyango bonda Simona, baki nda yila disangi nda iyeke djoi iyo baki bankandji bana nse. 17 Yeso ondasangelaki mbo; Loyakaka londjele ko ndokolophilola bankandji ban'anto. 18 Sheko iyo atshikaki basangi bandiyo phwaphwa, andoyelaki. 19 Akiandi alekaka empudi, andi onenaki Yakobo, bona bonda Zebede, la Yoane bonanyango nda wato nda disamba basangi andiyo. 20 Andi ondaetaki phwaphwa, la iyo atshikaki Zebede ishe nda wato, andi la bakambi banandi, baoloyela.

21 Baolotshwa nda Kapenuma; nkako, nda win'onda Sabado andi ondotshwaki nd'etombolelo, ondaekyaki. 22 Iyo aphephaki nda yekyelo benandi, l'olok'ona andi ondaekyaki shenda bonto la mpipho apha shenda bakotshi banda benkanda. 23 Koko, bonto okiako nda etombolelo endiyo, oki la diphopho din'ombe. Andi ophaphangwaki mbo; Isho la we djo dinkono we Yeso bosu Nasaleta? W'omboyaka diyotophita, sheleko? Emi ndokeya, we ende ekila ena Nkumundjeyi. 25 Ko Yeso ondolemwaki, osangaki mbo; Ambyaka lophoso, olaka m'el'andi. 26 Sheko diphopho diko dina mindu ondophuphunganyaki, ophaphangwaki boolo, ondolaki ma botema bonandi. 27 Shene iy'auma baphephaki la banduwulanaki mbo, One no? Yekyelo ene end'oto eyadi no? Andi ayadi dikekemyaka baphopho banda Satana la bako yookodyaka. 28 Shene bosako bonandi botshangwa phwaphwa nda bokidi bona Ngalili bya.

29 Nkako, akiyo wolaka ma etombolelo, baolotshwa oka Simona l'Andele, iyo la Yakobo la Yoane. 30 Ko bokilo bona omoto bonda Simona aoletama la nkangi enda dilanga. Ko phwaphwa iyo andosangelaki djo dinandi. 31 Andi otutamaki ele andi, ondokataki la lo lonandi, ondetolaki ma ntangi; ko teya tonda djongi tokitela nk'ako l'andi ondakambelak'olimo. 32 Ko la dikolo, nda bontonyontonyo iyo ayakaki el'andi l'anto bauma baki la nkangi, la baiko baki la baphopho ban'embe. 33 Ko bas'ola bya asukamaki el'andi nda wisho bonda lodu, 34 la andi ondikiyaki banto eusa baki la nkangi ikiyo akonaka, bekeledi la bekeledi, la andi onditaki baphopho ban'embe phala; aye and'atimedya baphopho ditephela, djo inda iyo baoleya.

35 N'ama pu andi ondetshwaki, wina botokye, la andi ondolaki ma lodu okendaki nda wudi ona mpampa, ondotshaki Ndjambi mpiko. 36 Ko Simona la bankina baki l'andi andoasaki; 37 la akiyo wisholak'andi, iyo andosangelaki mbo, Banto bya bayadi dikasaka. 38 An'ondasangelaki mbo; Tokende nda wudi bonkina nda benanga betshutshi nkina ndoyasambedye o l'iyo bosako; nda djo diko ikimi ayakaka. 39 Sheko andi ondasambedyaki nda itombolelo indiyo bya nda baowa bana Ngalili; aolita baphopho ban'embe.

40 Ko bosu bangendji oyakaki el'andi, aoloonda, aoshumya baongo nd'oso bonandi aolosangela ayandi; Nkina w'olanga we yeyaka dindikya. 41 Koko, andi aolokesela nda botema l'andi onanolaki lo lonandi, ondoshidiyaki ondosangelaki mbo; Emi nanga, ikaka. 42 Ko akiandi atephelaka bangendji banandi aolima m'el'andi phwaphwa, la andi aolika. 43 Ko andi ondokekemyaki boolo, ondolesaki dikenda nd'etamba eiko, 44 ondosangelaki ayandi, Phongaka we lako disangela nkul'onto djo ine; kendaka ele botshedi diyatshumya el'andi; lambolaka bolambo bonda yika

endawe sheki Mose akekemyaka shenda eshile el'iyo. 45 Aye akiandi wolaka, andi aolangola disakola bosako boiko nd'atei an'anto. Ko shene Yeso ateya yotshwa nda bola phululu ko aotshikala n'andja nda itetenyi ina mpampa, l'anto andokendelaki ma djowa la djowa.

Tshapita 2

1 Aki betsho bemodi alekaka andi aoluta yotshwa nda Kapenuma, la bosako botshangwa mbo, Andi alako nda lodu. 2 Ko anto eusa baotaana el'andi phwaphwa ko shene djowa ditokiako nkula nda wisho; la andi ondalakaki djoi. 3 La banto anei bayakaki ele andi bayotodya bosu lwata. 4 Akiyo bateya ditutama ele andi l'olok'onda bolomba bon'anto, iyo atelolaki nshamba enda lodu lokiandi nkoko, l'akiyo wimolaka nkashi iyo akitedyaki bolalo boki bosu lwata wetamaka. 5 Sheko aki Yeso wenaka yimedya indiyu, andi osangelaki bosu lwata mbo; Bon'onami, bemb'endawe bephophyama. 6 Aye bakotshi bamodi ban'enkanda aki mpiko andudi, la iy'aoyauwulana nda betema endiyu mbo, 7 Bonto one atephela shene la no? And'aotola Ndjambi. Bonto onkono yeyaka diphophya bembe phe nko Ndjambi and'o mele? 8 Ko Yeso aoleya phwaphwa nda botema bonandi mbo; bakanedya shene nda betema bendiyu, la andi ondasangelaki ayandi, Lombiky'aoi ane dikodi nda betema beninyo sheleko? 9 Bolekola djoi inda itshila no, Disangela bosu lwata mbo, Bembe bendawe bephophyama, nkina disanga mbo; Etshwaka, ambolaka bolalo bondawe, kendaka? 10 Aye djoi ina inyo yeya mbo, Bona bon'Onto la mpipho na motshi ine enda diphophya bembe bena anto (andi osangelaki bosu lwata mbo) 11 Nshokosangela ayemi, Etshwaka, ambolaka bolalo bondawe kendaka nda lodu londawe. 12 La andi aoletshwa, ko aolambola bolalo phwaphwa, ko andi okendaki enandi nd'oso bondiyu bya. Shene iyo ashashimwaki iyo bauma, baotombola Ndjambi, baosanga mbo; Toteni djoi inda bophu one nd'oso.

13 Andi ondutaki dikenda nda bompandje bonda iyeke; bolomba bya bon'anto botutamaki ele andi ko andi ondaekyaki. 14 Akiandi alekaka andi onenaki Lewi bona bonda Alephosa, udi nda elambolelo; andi ondosangelaki mbo; Ondjeli. Sheko andi aolemala, aoloyela. 15 Akiandi wetamaka nda lotonda okandi, balambodyi banda belambo phala la banto ban'embe bayakaki, baoletama la Yeso la baeko banandi nda lotonda, djoi inda iyo baki eusa la iyo baoloyela. 16 Aki bakotshi ban'enkanda la Bafalise wenakandi ala toma la banto ban'embe o la balambodyi banda elambo, baoluwula baeki anandi mbo, Sheleko elandi la emelandi la balambodyi banda elambo l'anto bana embe no? 17 Ko, Aki Yeso wokaka djoi indiyu, andi ondasangelaki ayandi, Banto aiko bayadi la mpamba baphelengani la wikyi, phe nk'aiko baokona nkangi: emi ntoyak'iyeta banto band'olotshi;

ndjaki iyeta banto ban'embe.

18 Baeki banda Yoane la Bafalise bayaki dikilaka toma; ko iyo ayakaki el'andi, la baolouwula ayiyo, Sheleko eyadi baeki banda Yoane la banda Bafalise dikilaka toma, aye baeki bandawe baphokili toma? 19 Yeso aolauwula mbo, Bana band'ele banda tosoke tonda bosongi onda wadi dikokaka dikila toma nkina bosongi onda wadi ale nd'atei bandiyo? Eleng'eyadi bosongi bonda wadi l'iyi baphokoki dikila toma. 20 Aye betsho bekoya bekophonolalomiyo bosongi bonda wadi m'ele iyo; nda wina boiko baokokilalomi toma. 21 Lak'onto aokosamba etate enda etoo end'oto nda etoo esoteka l'oloko onda etate ekimola empudi ma etoo ene esoteka la yatsha eiko ekolekol'onene. 22 Lak'onto aokangola baana band'oto nda dikutshu ina mposho inda elengelengi, baana baphoyate dikutshu dina mposho, la baana baphoyotshangwe, la dikutshu ina mposho diphoyophitane; ko iyo baokangola baana band'oto na mposho ind'oto.

23 Nda wina bonda Sabado andi osembaki nda disala inda basangu; baeki banandi baoleka nd'oso onandi, baolangola dimokola basangu. 24 Bafalise baoluwula ayiyo, Phalaka, baeki bandawe bayadi dikelaka djoi diyadi ekila nda wina bonda Sabado la no? 25 Andi aolauwula mbo; Inyo lotophalola djoi diki Davidi akelaka akiandi welenganaka, la akiandi la ndjala, la baiko baki la andi? 26 Akiandi wotshwaka nda etombolelo nda betsho beki Abayata botshedi bonda boso; l'andi aleki toma tonda ditshumya, toko toki ekila nda dila, imolaka nko baotshedi: andi okaaki baiko baki l'andi. 27 Ko andi ondasangelaki mbo; Wina bonda Sabado otongamaki djoi ina anto, banto batotongama djoi inda win'onda Sabado. 28 Ko sheko Bon'on'Onto ayadi Nkumu enda wina bonda Sabado.

Tshapita 3

1 Andi aoluta yotshwa nd'etombolelo; la bonto okiako la lo lonandi lolonda. 2 Ko baolophala mbo, Nkina andi aokoikya nda wina bonda Sabado? (inda iyo yotongela djoi). 3 Andi osangelaki bonto la lo lolonda mbo, Udwaka, emalaka nd'atei an'anto. 4 Ko andi ondauwulaki ayandi, Dikela djoi ind'olotshi nda wina bonda Sabado diyadi ekila, nkina dikela djoi in'ombe? Disuka lomo nkina didjaka? Ko iyo baolulama wee. 5 Akiandi wakyakephaka la nkele nda didyalenga l'oloko onda boolo bonda betema endiyo, andi osangelaki bonto ayandi, Nanolaka lo londawe. Sheko andi aolonanola la lo lonandi losolongana. 6 Bafalise baolola phwaphwa baolotshwela ekoka, iyo l'asi Elode inda yodjaka.

7 Yeso aoluta, andi la baeki banandi nda iyeke: bolomba bon'onene ma Ngalili bandoyelaki, o la ma Yudiya, 8 o la ma Yelushalema, la ma Idome, la ma wudi bonda Yolodana, o la ma bempandje benda Tura la Sidona;

bolomba bona onene, akiyo wokaka baoi bakiandi akelaka baoyaka el'andi. 9 And'osangelaki baeki banandi mbo, Lotshikalaka ntutama la emi la wato, basi bolomba baphoyompukya. 10 L'olok'onda andi aolikya banto eusa; sheko baiko bauma bayaki la nkangi baotaana el'andi dinda yokata. 11 La aki baphopho ban'embe wenakandi baikwa nd'oso bonandi, baophaphangwa mbo, W'ondoyadi Bon'ona Nkumundjeyi. 12 Aye andi ondasukaki boolo mbo; Lotondisholaki.

13 Andi aoyolunda nda bokoto la aoleta el'andi baiko akiandi asangyaka andi mele, k'iyo aotutama el'andi. 14 La andi osonaki bonkama la aphe inda iyo diyala l'andi, in'andi yasokola diyosambedyo banto, 15 la ind'iyo diyala la mpamba enda yimola baphopho ban'embe. 16 And'aolila Simona dina mbo; Petero; 17 andi aolila Yakobo bona bonda Zebede, la Yoane bonanyango bonda Yakobo baina mbo; Boanenge, ayawe, Bana banda dikungula dina mbula; 18 la Andele, la Filipino, la Batoloma, la Mateyo, la Tomasi, la Yakobo bona onda Alefusa, la Tadeyo la Simona osi Kanana, 19 la Yudas Isakaliote, boiko ondosongolaki. Ko iyo baolotshwa l'andi nda lodu.

20 Bolomba bona anto boluta disukama ele iyo, shene iyo bateyi nkula dila toma. 21 Ko aki basi diyotshi dinandi wokaka djoi diko, iyo akendaki diyookola, iy'asangaki ayiyo; Andi aokona lotodi. 22 Bakotshi ban'enkanda ayakaki ma Yelushalema, basanga mbo; Belesebula aolaphema, la andi ayadi yimolaka baphopho ban'embe la bokemba bona nkumu endiyo. 23 Yeso ondaetaki el'andi ondasangelaki na nshawu mbo; Satana aokeya yimola Satana sheleko? 24 Nkina waphemelo boyatshwana, boko bophongeya dikokomela. 25 Nkina lodu lombatshwana lodu loiko lophongeya ditshikala; 26 la nkina Satana aoyauna boshela, aokatshwana la andi aphonongeya ditshikala, ko djoi dinandi diyokoshila. 27 Lako bonto bondeya yotshwa lodu londa bonto bona mpamba la diphonola djomba dinandi, lako nde and'ambotshungya dwel'ona mpamba nd'oso, ko m'okongo andi aokophonola djomba dinandi ma lodu lonandi. 28 Soosolo ndolosangela mbo; Bembe beuma ben'anto o la ditunyi ditola iyo Nkumundjeyi, diko dikusa diphophyama; 29 aye bombe bosoko bona onto bondophindula Nyuma end'Olotshi bophongophophyamalomi elengi ndi diiyo, koko andi ambata mbalako enda bombe enda botshwako. 30 Djoi inda iy'asangaki mbo, Andi ayadi la diphopho dina mindu nda botema bonandi.

31 Ko nyango la ban'ana nyango baoyaka el'andi, baolemala n'andja, koko iyo asokolaki bonto inda yoeta. 32 Bolomba on'onene bon'anto ondosamanyaki. La iyo andosangelaki mbo; Phalaka, nyongo la bana ana nyongo bemi n'andja; iyo baoyokasa. 33 Ko andi aolauteya djoi mbo; Ngoya

ayadi no, o la bana ana ngoya iyo no? 34 Andi okyakephaki baiko bandosamanyaki, osangaki ayandi, Ngoya la ban'ana ngoya, iy'ane! 35 L'oloko onda bonto boumela bondoyadi dikelaka shen'elanga Nkumundjeyi, andi ayadi bona ona ngoya bonda dwele, la bon'ona ngoya on'omoto, la ngoya.

Tshapita 4

1 Andi aoluta yangana yaekya n'ompandje bonda iyeke. Bolomba bona onene bon'anto andosamanyaki nkoko la andi ondotshwaki nda wato, aolilama nkoko nd'atei and'ashi la bolomba bouma bon'anto olemala n'ompandje bond'ashi. 2 Andi ondaekyaki baoi phala na nshawu, ondasangelaki nda wekyelo bonandi mbo; lokodyaka, lophalaka; buyi bonda yopho okendaki yuya yopho. Ko akiandi wuyaka, yopho emodi ekweki n'ompandje ona mboka la mpuru inda loola iyoyakaki diton'eko. 5 La enkina emodi ekweki na motshi iki nd'adiko anda bayoko mpene eki motshi itshila; ko eko endolaki phwaphwa l'oloko ona motshi itokiako phala. 6 Aki wina asangwaka, eko enyelaki l'oloko onda eko etophoyala l'ekindja. 7 Enkina emo ekweki nd'atei anda baeke; baeke andolaki andotshidiyaki, la eko etophudya yopho. 8 Enkina emodi ekweki na motshi ind'olotshi la eko ephudyaki yopho, belola, bephula phala, bephudyaki bemodi benkama esato, benkama esato; bemodi benkam'otoa, benkam'otoa; bemodi boni, boni. 9 l'andi osangaki mbo; Ondoyadi l'atoi anda yoka, okaki. 10 Akiandi nko andi mele, baiko baki ntutama l'andi, la baeki bonkama l'aphe anduwulaki djo in a nshawu. 11 Ko an'ondasangelaki ayandi, Baolokaya inyo inda yeya baoi baolishama banda waphemelo bona Ndjambi, aye ele baiko bale n'andja, baoi bauma baokelama na nshawu. 12 Shene, aphaliyo, iyo diphalaka aye baphene, la andok'iyo, iyo yokaka aye baphokandjwe ind'iyo batokadimolaki betema bendiyo inda bembe endiyo betophophyamaki. 13 La andi ondasangelaki mbo; Inyo lopheyi nshawu ene? Sheleko ekeyalominyo nshawu iumela? 14 Buyi bonda yopho yuyaka djo. 15 Iy'ane n'ompandje bona mboka mpene enoniyo djo, sheko andok'iyo, Satana diyakaka phwaphwa diyophonola djo dikiyo wonaka nd'etem'endiyo. 16 Iy'ane baolonama nd'adiko anda diyoko o phyophyo; andokiyo djo baimedya phwaphwa la boshadu; 17 ko iyo bapha la bekindja nda betema bendiyo, ko iyo bayadi ditshikalaka empudi enda ishishi: ko ayaka elu l'ephephe l'oloko onda djo, baokobana phwaphwa. 18 l'ankina bayadi baiko baolonama nd'atei anda baeke: iyo yokaka lolaka, 19 aye nkanedya inda baoi bana motshi la batshuya anda diyonga la mposa enda djomba inkina yotshwaka nd'etema inda didingitanya djo, ko diko dipheyi diphudya yopho. 20 Iy'ane baolonama na motshi inda bolotshi; iyo yokaka djo la yimedya, la bayadi

diphudyaka yopho, benkama esato, benkama esato; benkam'otoa, benkam'otoa; boni, boni. 21 La andi ondasangelaki mbo; Itshwa imboyelama inda yoila n'ase anda bokumbo, nkina n'ase ana ntangi? Apha inda yambya nd'adiko anda ilelo enda itshwa? 22 Lak'emba endishama eph'iyo weyi yishola eko: lako djoi dikukama diph'iyo wishule nd'iyani. 23 Ayala bonto la batoi banda yoka, okaki. 24 Andi ondasangelaki ayandi; Lophwaka baoi bandokinyo; baokoleledya djomba nda iyedi indeledy'inyo la iyo baokolokaya djomba dinkina nd'adiko. 25 Djoi inda bonto bouma ondoyadi la djomba, baokookaya dinkina nd'adiko; ko bonto bopha la emba baokoophonola eko ekatandi.

26 Ko andi osangaki ayandi, Waphemelo bona Nkumundjeyi ole shene; nga bonto aolona yopho na motshi; 27 andi yetamaka la yetshwaka l'otsho la nd'iyani, la bopho yolaka, boshekphwa, aye andi apheyi shene eshekphw'oko. 28 Motshi iko mele iphudyaka mamo; nd'oso lokashi, m'okongo ephundu, nda esuka yopho eshokemba nd'ephundu. 29 Andela mamo, andi osokola bombai mbo, Emukelo ekoka.

30 Andi osangaki mbo; Tokowanya waphemelo bona Ndjambi l'emba enkono? 31 Boko boyadi shenda bopho bona mutadi bononiyo na motshi. Ko, boko bolecola yopho euma ena motshi itshila, 32 aye, anooniyo na motshi, boko boshekphwa, bolecola tonkankashi bya l'onene, la boko yilaka itaphi in'enene; ko mpuru inda loola yeyaka dikotama nda dididingi dind'oko. 33 Andi otephelaki la iyo la nshawu eusa shene eki wanya bondiyo akokaka yokodya lolaka. 34 Andi atotephela la iyo phe nko la nshawu, ko sheko andi okophodyaki baeki banandi baoi baiko baumela nda ishimo.

35 Nda wina boiko nda dikolo, andi ondasangelaki mbo; Kela, tophumbvwe nda wudi bonkina. 36 Akiyo akendjaka bolomba bona anto iyo andotshwaki la andi phwaphwa nda wato; yato enkina emodi beki l'andi. 37 Belundi ben'enene beyaki, la batshindidi banda ashi baolotshwa nda wato sheko boko bongasa dilola l'ashi. 38 Andi mele aki nd'okongo, etsh'ilo nda boikwa. Ko iyo baoletola la iyo andosangelaki mbo; Wekyi we ophotoki lokesedi, tophoyowa? 39 Ko andi ondetshwaki, olemwaki ephelele, osangelaki diyeye mbo; Ilamaka wee. Ko lompompo lophototalaki la wee bon'onene boyaaiki. Andi ondauwulaki mbo, Sheleko endokinyo bophodu? Inyo lopha la yimedya sheleko? 41 La iyo awaki la bophodu bon'onene, baosangelana mbo, Bont'one no? Nkula lompompo la bashi banda diyeye yimedya djo inandi.

Tshapita 5

1 Ko iyo akundjwaki nda wudi bonda diyeye nda bokidi bond'asi Ngadara. 2 Akiandi wolaka ma wato, lak'elengi dwele ondokanemaki l'aphopho bana

mindu oyakaki diyophomana l'andi. 3 Andi ondilamaki nda ekundu; lako bonto bondeya yotshungya; 4 djoï inda iyo andotshungyaki betshungya phala la bakata o la na nkandjo, ko andi otenaki nkandjo, otshangolaki bakata; lako bonto ondeya yotekya. 5 Betsho beuma l'otsho o la nd'iyani, nda dikundu la nda bekoto and'ophaphangwaki la oyakotaki la baoko. 6 Akiandi wenaka Yeso m'itatali andi olotaki, ondombolaki. 7 Ko andi olemwaki la lolaka lond'oolo mbo; Emi la we djoï dinkono, we Yeso Bona ona Nkumundjeyi enda loola? Emi nshokoonda nda dina ina Ndjambi ayemi, Tonkindjaki elu. 8 L'olok'ona andi ondosangelaki mbo; Olaka ma botema bonda dwele one, we diphopho dina mindu. 9 Ko an'ondoulaki mbo; Dina indawe no? Andi onduteyaki djoï mbo, Dina inami mbo; Bolomba bon'onene, l'oloko onda isho tole phala phala. 10 10 Andi onoondaki boolo mbo; Totokimaki ma iyekele ine. 11 Sesoko botonga bona nsumbu ind'ola boyaki nda bokitela bonda bokoto nda dikomola bailo. 12 Baphopho anoondaki mbo, Otosokoli nd'etema bena nsumbu, totshwe nkoko. 13 Nkako Yeso aolimedya. Ko baphopho bana mindu andolaki, andotshwaki nd'etema bena nsumbu; botonga boiko bona nsumbu olotaki la iyango nda bokitela bonda diyeke, (eusa endiko eki shenda yoni benkama bephe) la iko iwaki nd'ashi. 14 Baleshi band'iko alotaki, atshangolaki bosak'oiko nd'ola la nda tosamba. Iyo ayakaki diyophala djoï diko diyokelamaki. 15 Ko iyo ayakaki ele Yeso, la anenaki dwele ondokanemaki la baphopho bana mindu, udi, olotshi etoo, aoyala la mpima enda olotshi; and'iko boki la bolomba bonda baphopho nd'oso: ko iyo baolok'ophodu. 16 Ko banto anenaki djoï diko andasangelaki baï baokelam'ele dwele ako oki la baphopho, o la djoï ina nsumbu. 17 La iy'aolangola yoonda mbo; Imaka ma iyekele indiso. 18 ko akiandi wotshwaka nda wato dwel'ako ondokanemaki l'aphopho onoondaki mbo, Imedyaka emi nsembi la we. 19 Aye andi atimedya, ko andi ondosangelaki ayandi, Kendaka okawe ele tosoke tondawe, ko sangalak'iyô baï ban'anene baki Nkumu akokelelaka, la lokesedi lokiandi akookaka. 20 Andi okendaki diyotshangola nda Dekapoli baï ban'anene baki Yeso wokelelaka, l'anto baumela aphephaki. 21 Aki Yeso wutaka diphumbvwa nda wudi bonkina nda wato, bolomba bon'onene bon'anto osukamaki ele andi. Ko andi aki na bompandje bonda diyeke. 22 Ko phalaka nkumu emodi enda etombolelo, dina dinandi Yailo, oyakaki ele andi; l'akiandi wenakandi, andi aolokwa akukumeki nda bakaka banandi, 23 aoloonda boolo mbo; Bon'onami bond'itshila bonda bomoto asa diwa; nshokoonda mbo, Yakaka yoaphye bakata andawe nkina andi aiki, la andi aokoyala la lomo. 24 Andi okendaki ko andi la bolomba bona onene bona anto baoloyela la baolosamanya.

25 Bomoto omodi oki la nkangi enda ileka bolungu bew'onkama la bewa ephe; 26 aokinda elu nda bakata bana nkanga esua, l'andi oshidiyaki bakuta anandi bauma, lako yika nkula empudi enda ishishi, aye nkangi elolekola. 27 Akiandi wokaka bosaka bonda Yeso, andi oyakaki nda bolomba bon'anto nda bokongo bonandi, l'andi okataki bophimb'onda etoo enandi. 28 Andi oyangangelaki mbo, Akatal'emi nkula itoo inandi, ndokikalo. 29 Ko etuku enda bolungu bonandi eshoma phwaphwa, l'andi aoleya nda djongi inandi mbo; Emi mboshila yika ma nkangi esoko. 30 Ko phwaphwa Yeso aoleya nda botema bonandi ayandi; Mpamba esola m'ele emi, sheko andi aokyakepha nda bolomba bon'anto, onduwulaki mbo; Ondokataki etoo enami no? 31 Baeki banandi anduteyaki djoi mbo, We ophene bolomba bon'anto bakosamanya, ko w'osanga ayawe, Omonkata no? 32 Andi aokyakepha inda yena ondokelaki djoi diko. 33 Ko bomoto aolok'ophodu la andi olengaki, aoleya djoi diyokelama ele andi, la andi oyakaki nd'oso onandi, ondosangelaki baoi bya phululu. 34 Yeso ondosangelaki ayandi, Bona bonami bonda bomoto, yimedya endawe we embokikya; kendaka la wee, ikaka ma nkangi endawe.

35 Akiandi wosangelaka djoi diko bamodi ayakaki m'oka nkumu enda etombolelo, baosanga ayiyo, Bona bondawe bon'omoto aowa; ambyaka diphukya Wekyi. 36 Aki Yeso wokaka djoi indiyo, nkako andi osangelaki nkumu enda etombolelo mbo; We tokaki bophodu, djoi diphoko, phe nko yimedya. 37 Andi atimedya nkul'onto yamana la andi lako nde Petero la Yakobo la Yoane, bonanyango bonda Yakobo. 38 Iyo akundjwaki oka nkumu enda etombolelo, baolena bokakatano la banto eusa baolela, baosekuma boolo. 39 Akiandi wotshwaka andi aolasangela mbo; Sheleko ephos'inyo l'eledinyo no? Bona atowe ko etsh'ilo. Aye iyo andosokaki. Akiandi waimolaka iyo baumela, andi okolaki ishe enda bona la nyango, o la baiko baolamana la andi, aolotshwa mpene eletama bona. Andi okataki lo londa bona, ondosangelaki ayandi, TALITA KUMI, dikadimola inda baoi ane mbo, Bona on'omoto nshokosangela ayemi, Etshwaka. 42 Ko bona onda bomoto aoletshwa phwaphwa la aokenda djoi ina andi oki la bewa bonkama la bew'ephe. Ko baolekola ishashimwa. 43 Andi ondasukaki boolo ayandi, Bonto onkina ateyaki djoi ine; l'andi ondakekemyaki mbo; Lookaaka toma tonda dila.

Tshapita 6

1 Andi aolima m'aiko, aoluta diyaka okiyo, ko baeki banandi andoyelaki. 2 Aki wina bonda Sabado akundjwaka andi aolangola yeky'anto nd'etombolelo. Banto eusa, akiyo wokak'andi, aphephaki mbo; Dwele one aokola baoi ane ma nko? La, Mpim'enkono ekiyo wokaaka ena andi yeya

dikela bekeledi bene bena mpamba l'akata banandi? 3 Andi aphoyadi botshudi bond'abaya, ale bona onda Madiya; bonanyango onda Yakobo la Yose la Yudasia la Simona? Ko bananyango band'aimato baphoyadiako nd'atei andiso? Sheko iyo baobana l'oloko onandi. 4 Yeso ondasangelaki mbo; Baphosotshe bosangi lako nde nda iyekele inandi munge o la nd'atei banda diyoto dinandi la okandi. 5 Sheko andi ateya dikela baoi ana mpamba aye andi ondaphyaki basi nkangi bamodi bakata, aolaikya. 6 La andi ophephaki djoi inda bophedya bondiyo. Andi otshatshilaki nd'ola l'ola nda yekyaka banto.

7 Andi ondetaki baeki banandi bonkama la baphe el'andi, aolangola yasokola baphe, baphe: la andi ondakaaki mpamb'enda yaphemela baphopho ana mindu; 8 andi aolakekemya ayandi, Lototombaki toma tonda ila na mboka nko dilanga intulu; apha disuki, apha lotoko, apha bakuta nda dibinga; 9 aye lolotaka milato, lotokolaki bekoto bephe. 10 An'ondasangelaki mbo; Andotshwalominyo nda lodu, lotshikalaka nkoko elengi ndi akendalominyo. 11 Ko nkina banto bapholokolola, la iyo bapholangi yoka baoi aninyo, akendalom'inyo ma mpiko, lophumelakiyo boutshu boende n'ase banda akaka baninyo shenda boenyi ele iyo. 12 Ko akiyo akendaka, baosambedyo banto mbo; Lonyolaka betema beninyo. 13 Iyo animolaki baphopho ban'embe eusa, la iyo asangolaki basi nkangi phala la nsadi, la iyo andaikyaki.

14 Nkumu Elode aoloka djoi inandi; (l'oloko onda dina dinandi dileyama) ko andi osangaki mbo; Yoane Batisti ambetshwa ma bewedi, shene bekeledi ene bena mpamba bekelema el'andi. 15 Bankina mbo; Andi ayadi Eliya; bankina mbo, Andi ayadi bosangi, nkin'omodi shenda basangi bankina. 16 Ko aki Elode wokaka djoi diko andi osangaki ayandi, Bosoko nko Yoane okimi wotenaka botsha; andi amboyetshwa ma bewedi. 17 Nd'itshina inda Elode o mele osokolaki banto diyokanda Yoane, la andi ondotshungyaki nda lodu londa lonkandju l'olok'onda Elodiasi, wadi onda bonanyango Filipi, okiandi asongaka. 18 Djoi inda Yoane osangelaki Elode mbo, Aphokoki we yilama la wadi onda bonanyango. 19 Ko Elodiasi ondokaki Yoane bosudu nda botema bonandi, aolanga yodjaka; aye andi ateya yodjaka, 20 djoi inda Elode aoloka Yoane bophodu, la aoleya mbo, Andi ale bont'onda bolotshi l'ond'ekila l'andi aolumba o wee. Akiandi wokaka baoi anda Yoane, nkul'andi okakanaki phala, aoloka botephelo bonandi la boshadu. 21 l'aki wina onda yutsha akundjwaka, wina onda yophwa yotshwa end'Elode, andi okatedyaki bakphulaki banandi la tophita tond'asoda anandi l'ankumu and'asi Ngalili dilambo. 22 Aki bompaka wa bomoto bonda Elodiasi wotshwaka, andi aolina nkanga, aosalanganya Elode, andi la baiko baleki l'andi nda

lotonda; ko nkumu Elode osangelaki bompaka wa bomoto mbo; Ondotshe emb'elangawe ndokokay'eko. 23 Andi aoloshimba mbo, Ndokokokaya emba endotshawe nkula empudi enda iphe enda waphemelo bonami. 24 Ko andi aolola, aoluwula nyango mbo, En'emba endotshemi no? Andi onduteyaki djoi mbo; Otshaka botsha bonda Yoane Batisti. 25 Ko andi aolotshwa l'iyango ele Elode, aolosangela mbo; Onkaaki botsh'onda Yoane Batisti nda lophephe etambene. 26 Ko nkumu aoyakonya phala, aye l'oloko onda dishimba dikiandi ashimbaka, o la nsonyi enda baiko baleki l'andi nda lotonda, andi atolanga diphuma bompaka bona bomoto; 27 ko Elode osokolaki bomodi onda basoda wesanyi bonandi, ondosangelaki ayandi, Ondjele botsha bonandi. Ko andi okendaki ondotenyaki botsha nda lodu londa lonkandju. 28 Andi oyelaki botsha bonandi nda lophephe, akaaki bompaka bon'omoto la bompaka akaaki nyango. 29 Aki baeki anandi wokaka djoi diko iyo ayakaki, baikola bodwu bonandi, baolokunda. 30 Sheko baeki baosukama etenyi ephoko la Yeso, baolosangela baoui bauma, o la bakiyo akelaka o la bakiyo wekyak'anto. 31 Ko andi ondasangelaki mbo; Loyakaka inyo nd'etenyi na nkuku, loyutshaphele. Djoi inda banto eusa baotshatshila la iyo batoyala la djowa inda dila toma. 32 Iyo akendaki nda wato na nkuku nda etenyi ena mpampa. 33 Banto phala ananak'iyo basembi, baolalimbitela ko iyo baosuula mpiko nda ekulu ma bekphulaka beuma la baolalekana nd'oso. 34 Aki Yeso wolaka ma wato, andi onenaki bolomba bon'onene bon'anto, aolaoka ishei l'oloko ond'iyo baki shenda benkoko bepha la umbi; la andi aolangola yaekya baoui phala. 35 Aki wina bongasa yila, baeki banandi ayakaki el'andi, baolosangela mbo, Etenyi ene eyadi mpampa la wina wasa yila; 36 lesaka banto ane nkina bakende nda tosamba o la nda bekphulaka ena ntutama, bayasumbeli toma, djoi ind'iyo bapha l'emba enda dila. 37 Ko andi ondasangelaki mbo, Inyo, lookaaka toma tonda dila. Iyo anduwulaki mbo, Kela isho tokende diyosumba toma tonda ila denariyo yoni ephe inda iyakaya inda iyo dila sheleko? 38 Andi ondauwulaki mbo; Inyo loyadi la ntoko inka? Lokendaka diyophala. Akiyo weyaka iyo andosangelaki mbo; Tole la ntoko itano la nse iphe. 39 Andi ondasangelaki mbo; Iyo bauma bilami la bolomba la bolomba nda bailo banda bolombo. 40 Ko Iyo andilamaki nda belomba benda boni, boni, la benkama betano, benkama betano. 41 Akiandi akolaka ntoko iko itano la nse iphe, andi aoluledya baisho nda loola, aoluteya elunga, aolatola ntoko, aokaya baeki banandi ntoko inda iyo yakaphela banto; o la tonsense tophe, aolakaphela iyo bauma. 42 Iyo bya aleki akindaki. 43 Iyo baolambola totate totshikalaki, baolodya tosaka bonkama la tophe o la tonsense phyophyo. 44 Baikole baleki toma baki

bele yoni benkam'etano.

45 Ko andi osokolaki baeki banandi phwaphwa nda wato inda iyo dikenda nd'oso bonandi nda wudi bonkina nda Betesaida, l'andi otshikalaki nd'okongo nko andi o mele l'olok'onda yuteya banto okiyo. 46 Akiandi alakanaka la anto, andi okendaki nda bokoto ind'iyotsha Ndjambi.

47 Aki wina wilaka, watu boki nd'atei anda diyeye, la andi otshikalaki nda bokidi and'o mele. 48 Akiandi wenaka mbo; Iyo baolena elu nda dilukaka, nd'itshina inda lompompo lolasokola nd'okongo, aki nkoko end'oso atephelaka n'am'ipupu, andi oyakaki ele iyo ayokyakenda nda adiko and'ashi: l'andi aongasa yalekana. 49 Akiyo wenakandi asembi nd'adiko and'ashi baokanedyo mbo; Ditololo, dika diko; baotatana. 50 L'olok'onda iyo baumela baolena, la iyo bawaki la bophodu. Nkako, andi otephelaki la iyo, aolasangela mbo; Lokembaka nda betema, emi one, lotokaki bophodu. 51 Andi aolotshwa ele iyo nda wato, lompompo lotshitshimaki; ko iyo baolekola dishashimwa. 52 L'oloko onda iyo batokophola djoi inda toma, koko, betema bendiyo beyaaki boolo.

53 Sheko akiyo asaphwaka diyeye, baokundjwa nda bokidi bona Ngenesareta, baotutama nda dibungu. 54 Akiyo wolaka ma wato anto baoloeya phwaphwa. 55 Ko baotshatshila nda iyekele iko iuma, baolangola ditodya asi nkangi na ntangi indiyo, la iyo akendaki mpene ekiyo wokaka bosako mbo; Andi ane. 56 Akiandi akendaka nda bekphulaka nkula nda bela ben'enene nkula nd'oswe, baoletsha basi nkangi na mboka, boloonda mbo, Kela nde iyo bakokate phe nko nda bophimbo bonda etoo; ko baiko baumela andokataki baolika.

Tshapita 7

1 Bafalise la bakotshi banda benkanda bamodi baoyaka ma Yelushalema la baosukama el'andi. 2 Iyo baolena mbo, Baeki banandi bamodi aleki toma la bakata bana mindu, batophosolama. 3 (L'oloko onda Bafalise la basi Yuda baumela baphole lako nde iyo baosola bakat'andiyo olotshi, ko bayadi diyelaka bekeledi enda bankokonyango bandiyo. 4 Ko andutiyo ma djoka, iyo baphole imolaka iy'amboka ashi, o la la bekeledi benkina eusa bekiyo wimediyaka dikela, shenda disola mpondo, mpuki, la djomba ina nkunga, la tshweko). 5 Bafalise la bakotshi banda benkanda baoluwula ayiyo; Baeki bandawe baphoyeli bekeledi ben'ankokonyongo sheleko? Iyo aleki toma la bakata ana mindu. 6 An'ondasangelaki mbo; Esaya osangaki soosolo djoi ininyo ayandi inyo basi bodimbo; shene ekiandi akotaka mbo, Banto ane baompika la mbewu indiyo, Aye betema bendiyo beyadi etali m'ele emi. 7 Ko iyo bayadi dimemyak'emi bomwamemya. Iyo yekyaka banto dingembe dinda banto nda yekyelo endiyo. 8 Inyo yudwaka dingembe, lomboyela

bekeledi belokaya anto bena inyo dikela nga disola mpuki la mpondo la djomba dinda shene eusa. 9 Andi ondasangelaki mbo; Soosolo, inyo lophedya dingembe dina Nkumundjeyi inda inyo diyela bekeledi eninyo mele. 10 Djoi inda Mose osangaki mbo; Phikaka isho la nyongo; bonto bondotola ishe nkina nyango, andi awu soosolo mele. 11 Ko inyo losanga mbo, Nkin'onto aosangela ishe nkula nyango mbo, Emba ekiwe wasaka yamba m'ele emi eyadi Kolobana; (oshenda disanga mbo; Bokakaya ele Ndjambi); 12 la inyo lophimedye andi yuta ditan'ishe la nyango. 13 Shene iny'oyadi disekolaka lolaka lona Ndjambi la bekeledi eninyo ekinyo wambaka. Inyo loyadi la baoi phala banda shene bakel'inyo. 14 Akiandi witaka yeta bolomba bon'anto andi ondasangelaki ayandi, Inyo baumela, londokeli. 15 Emba enkumela, endotshw'eko nd'atei an'onto, eko epheyi yophita; aye baoi bandola ma botema bon'onto, bako baphita onto. 16 Ondoyadi la batoi banda yoka oki.

17 Akiandi atshikaka belomba ben'anto n'andja, andi aolotshwa nda lodu; baeki banandi baoluwula ditshina dina nshawu esoko. 18 Andi ondasangelaki ayandi; Inyo lophokatshi mpima? Inyo lophene mbo, Emba bya en'andja, andotshw'eko nd'atei an'onto, eko epheyi yophita, 19 nd'itshina ind'eko ephotshwe nd'otema bonandi aye phe nko nda dikundju, la eko yolaka nda iyela. Ko toma toumela tombedyama shiko. 20 La andi osangaki ayandi, Djoi ma botema bon'onto, diko diyadi diphitaka bonto; l'oloko ona m'atei, ma betema bena anto nkanedya in'embe yolaka, la bokelo, nimbo, 22 didjakana, la dilula, bekeledi ben'embe, bodimbo, wephepho, diso din'ombe, ditolana, bayumbya la iyayayi; 23 baoi ane bauma ban'embe yolaka m'atei anda botema bona onto, la bako bayadi yophitaka.

24 La andi aolemala, ko okendaki ma mpiko nda wudi onda Tula la Sidona; la akiandi wotshwaka nda lodu lomodi, andi atolanga banto yeya mbo; Alako. Aye andi ateyi yishama. 25 Nkako, bomoto oki l'ona bon'omoto ondokanami la diphopho ina mindu, aoloka bosako bonandi, oyakaki el'andi, aokwa akukumeki nda bakaka banandi. 26 (Bomoto oki bosu Ngerika ma wudi bonda Surapheneke). An'onoondaki mbo; Imolaka diphopho din'ombe ma botema bonda bon'onami bonda bomoto. 27 Aye Yeso onduteyaki djoi ayandi, Bana baongokinda nd'oso l'olok'onda lako olotshi dikola toma tonda bana la yushela mbvwa. 28 Sheko bomoto aolamba ayandi, Soosolo, Nkumu, aye tombvwa toyadi n'ase anda lotonda ileki mpumbu inda toma ton'ana. 29 Andi ondosangelaki ayandi, L'oloko onda lolaka lone, kendaka endawe, diphopho din'ombe diyoshila yima m'otema onda bon'ondawe. 30 Ko andi okendaki, okundjwaki okandi, la andi aolena bon'onandi etshi na ntangi, la diphopho dimboshila yima.

31 Andi aolima ma iyekele inda Tula la Sidona, aoleka nda bokidi bonda Dekapoli, aokundjwa nda diyeye dina Ngalili. 32 Baoloyela bonto ondokinda nd'atoi, aki o la dikokoma; la iyo anoondaki mbo; Aphyaphel'andi bakata bandawe. 33 Ko Yeso okendaki la andi na nkuku, aolila besai benandi nda batoi banandi l'akiandi atonyaka nsonyi, andi ondokataki nda lolemu lonandi. 34 l'andi aoluledya baisho nda loola, aophenga diphenga, aolosangela mbo, Ephata; oshenda disanga mbo, Odipholami. 35 K'atoi banandi baodiphwama phwaphwa la lolemu lonandi otshungwaki l'andi otephelaki bolotshi. 36 Ko andi aolakekemya ayandi, Lotosangelaki bonto; aye nkul'andi ondasangelaki besangala la besangala mbo; Lotosangelaki bonto, iyo baolekola ditshangola bosako boiko. 37 Iyo baolekola dishashimwa boolo, baosanga ayiyo, Baoi bauma bakel'andi bale nko bashimba; and'ayadi yokyaka basi ekinda la ditephedyaka basi nkishi.

Tshapita 8

1 Nda betsho beiko bolomba bon'onene bon'anto bokiako ko iyo batoyala la djowa nkula inda dila toma; andi aoleta baeki banandi el'andi, ko andi aolasangela mbo; 2 Emi ndoka bolomba one bon'anto ishei djoi ind'iyo baotshikala l'emi betsho besato ko baphokatshi toma tonda ila. 3 Nkina ndokasokola okiyo la ndjala baikokwa benkata na mboka; l'oloko onda bamodi baoyaka ma etali. 4 Sheko baeki anandi baoluteya djoi mbo, Nd'etetenyi ene lako emba enda ila; tayalo ditate inda toma inda dikindja bolomba one bon'onene ma nko? 5 Andi ondauwulaki ayandi, Inyo la ditate inda toma inka? Iyo baosanga mbo; Nsambo. 6 Ko andi aosangela bolomba bon'anto mbo; Lulamaka n'ase. Ko akiandi akolaka ditate nsambo inda toma, andi aoluteya elunga, aolatal'iko, ko aolesel'iko nd'akata banda baeki, inda iyo yambya nd'oso bon'anto, la iyo baolamby'iko nd'os'ondiyo. 7 Bayaki o la tonsense tomodi tonda totshila; akiandi watonyaka nsonyi, andi ondasangelaki ayandi, lambyaka lotoko nd'oso bon'anto. 8 Ko iyo aleki la baokinda. Ko iyo baolambola totate totshikalaki disaka nsambo too. 9 Baiko aleki baki shenda banto yoni benkama benei; la andi ondasokolaki okiyo. 10 Nkako and'aolotshwa nda wato la baeki anandi, aoyokundjwa nda iyekele dinda Dalamanutu. 11 Bafalise baoyaka, la baolangola yikya l'andi dikodi, baolasa ilimbitelo ma loola m'ele andi nda yomeka. 12 Ko andi aophenga diphengo nda botema bonandi, aosanga ayandi, Djoi ikono indasa lotshwelo lone ilimbitelo? Soosolo, baphongokaya lotshwelo lone ilimbitelo. 13 Ko andi aolatshika, aoluta yotshwa nda wato, aophumbvwa nda wudi bonkina. 14 Iyo baolophela ditomba toma, phe nko bomaka bophoko bonda toma boki nda wato. 15 Andi ondakekemyaki ayandi, Lophalaka, lephwaka bouledi bonda Bafalise la bouledi bonda Elode. 16 Iyo baotephelana mbo,

Nd'itshina inda tophokatshi toma. 17 Ko Yeso aoleya nkanedya indiyo l'andi aolauwula mbo; sheleko etephelan'inyo no? l'oloko ona inyo lopho la toma? Inyo lophokopholi? Inyo lopholimbiteli? Betema beninyo beyala boolo? 18 Inyo la baisho ko lophene; inyo la batoi ko lophoki; inyo lophophwe? 14 Akimi watolelaka banto yoni betano bemaka beiko betano benda toma, inyo lolambola disaka inka inda totate? Baoluteya djoi mbo, Ko bonkama la iphe. 20 O l'akimi watulelaka banto yoni benkam'enei bemaka nsambo benda toma, ko inyo lolambola disaka inda totate inka? Baolimedya mbo, Nsambo. 21 Sheko andi ondakomyaki mbo; Inyo lophokopholi sheleko? 22 Andi okundjwaki nda Beteseda; baoloyela bosu iyou, baoloonda mbo, Katakandi. 23 Ko andi okolaki bosu iyou nda dikata, aolotodya n'andja anda bola; akiandi wotonyaka insonyi nda baisho anandi, andi ondaphyaki bakata, aoluwula mbo; We ombena emba? 24 Andi aoluledya baisho, aosanga ayandi, Emi nena banto aye iyo baowana la besongo besembi. 25 Yeso aoluta yaphya bakata nda baisho banandi, ko andi aolika, aolena djomba diuma phululu. 26 Sheko andi ondosokolaki okiyo, ayandi, Totshwaki nda bola, tosangelaki nkula bonto nda bola djoi dine. 27 Yeso okendaki la baeki banandi nd'ekphulaka benda Kaisariya Filipino. Akiyo na mboka andi aoluwula baeki banandi mbo, Sheleko esanga banto djoi dinami no? 28 Baoluteya djoi ayiyo, Yoane Basisti; ankina mbo; Eliya; ankina mbo; Omodi onda basangi. 29 Andi ondauwulaki ayandi, Aye inyo, esanga inyo Emi no? Petero aoluteya djoi mbo; W'oyadi Kilisito. 30 Andi ondakekemyaki ayandi, Lotosangelaki nkula bonto djoi inami. 31 Ko andi aolangola yaekya mbo; Diyadi la Bon'on'Onto dikind'elu phala la ditonama ele dingambe din'anto la ele baotshedi band'oso la ele bakotshi banda benkanda, la didjakama; koko, alekalomi betsho besato, aokuta yetshwa m'ewedi. 32 Andi otephelaki djoi diko o phululu. Ko Petero ondokolaki, aolangola yolemwa. 33 Andi aolonwa la aophala baeki banandi, koko aophangola Petero mbo; Lekaka m'okongo bonami Satana, djoi inda w'ophokanedye baosi bana Ndjambi, aye baosi ban'anto. 34 La andi ondetaki bolomba bon'anto el'andi, o la baeki banandi, la andi ondasangelaki ayandi, Nkina bonto alanga dindjela, andi ayangani, amboli bosongo bonandi ona ndekesanya, andjeli. 35 Djoi in'onto onkono ondolanga yumba lomo lonandi, aokootshweya; bonto bonkono ondotshweya lomo lonandi l'olok'onda bosako bond'olotshi aokumb'oko. 36 Ko nkina bonto aokaya motshi inkumela la ditshweya lomo lonandi munge, waphwa bonandi boleko? 37 Bonto aokengola emba enkono la lomo lonandi no? 38 Bonto boumela bondok'embi la baosi anami nsonyi nda lotshwelo lone londa bokelo la lon'ombe, Bona on'Onto aokok'andi nsonyi nda wina oyakalomiandi la

bandjelo banandi nda ditombya dind'Ishe.

Tshapita 9

1 Andi ondasangelaki mbo; Soosolo, ndolosangela mbo; Bamodi anda baiko bemi ane baphongowa elengi ndi baokena waphemelo ona Ndjambi boshila iyaka la mpamba.

2 Aki betsho botoa alekaka Yeso okolaki Petero la Yakobo la Yoane l'andi okendaki la iyo nd'ikotolongo inda botali na nkuku, nko iyo mele, ko andi aophaningwa nd'oso ondiyo; 3 l'itoo inandi iyalaki ngedingedi ileki yelo; baedyi banda itoo bya bana motshi baphokusi yedya itoo shene. 4 Eliya la Mose baolenya ele iyo, baphulula la Yeso. 5 Koko Petero osangelaki Yeso ayandi, Wekyi, bolotshi munge isho diyala ane; imedyaka isho totongi tolombe tosato, imodi indawe, imodi ina Mose, la imodi inda Eliya. 6 L'olok'ona and'ateya djoi inkono inda ditephela; nd'itshina inda iyo baolekola yoka bophodu. 7 Ko, dilenga diyokitela ele iyo, la baoloka lolaka ma dilenga asanga mbo, One ayadi Bon'onami bolangemi; lokodyaka. 8 Akiyo akyakephaka phwaphwa, iyo batena bont'onkina, phe nko Yeso ontulu la iyo.

9 Akiyo akitelaka ma bokoto andi ondakekemyaki mbo; Lotosangelaki nkula bonto djoi dikinyo wenaka elengi ndi andetshwalomi Bona on'Onto m'atei anda bawaki. 10 Iyo baolumba djoi diko nd'etema endiyo, baoluwulana mbo; Yetshwa m'atei anda bawaki eyadi no? 11 Iyo baoluta yuwula mbo; Ko sheleko esanga bakotshi ban'enkanda mbo, Diyadi la Eliya diyaka nd'oso? 12 Andi ondasangelaki mbo; Soosolo diyadi la Eliya diyaka nd'oso la diphonga djomba diumela shene eki diko nd'oso: onde baokota djoi inda Bona on'Onto shene mbo; Baokookindja elu phala la baokootshila. 13 Ko ndolosangela ayemi, Eliya aoshila diyaka la iyo baolokelela djoi bya dikiyo alangaka yokelela shene ekiyo akotaka.

14 Akiandi wutaka ele baeki andi aolena bolomba bona onene bon'anto baoladinga, la bakotshi banda benkanda bikyana l'iyo dikodi. 15 Ko aki banto bya wenakandi, baolekola diphepha, la iyo alutaki ele andi, baolosasa. 16 Andi ondauwulaki ayandi, Enduwulinyo no? 17 Dwele lomodi ma bolomba aoluteya djoi mbo; Wekyi, emi ndoyaki ele we la bona onami bonda dwele; andi ayadi la diphopho din'ombe dinda ekinda; 18 ko ondokand'iko diko diyoundjaka n'ase; andi iyolaka loulo ma borumvu, la andi dikikimyaka baino, l'andi aolaphwa djongi. Emi ndoloonda baeki bandawe ayemi; Lodyaka diphopho, aye iyo batokusi yoodya. 19 Andi osangaki mbo; Inyo lotshwelo lophala la yimedya; ndokotshikala l'inyo empudi end'elengi no? Ndokokus'inyo elengi no? Looyelaka ele emi. 20 Baoloyela el'andi. Ko akiandi wenakandi, diphopho dishwephephya boolo

phwaphwa, sheko andi akweki na motshi, aokidimwa, ko loulo lolola ma borumvu. 21 And'okomyaki ishe mbo, Bona aoka nkangi ene betsho enka? Andi ondosangelaki mbo, Ma betsho enda iyana mpou; 22 aolila yila eusa nda teya o la nda bashi, inda yodjaka. Ko nkina we yeyaka djoi inda dikela, otoki ishei, ototani. 23 Ko Yeso ondosangelaki mbo; Nkina we yeyaka yimedy! Ele bonto bonimedy, baoi baumela baokusa dikelama. 24 Nkako, ishe ena ona ophaphangwaki la basodi nd'aisho mbo; Emi mimedy; onshidiyephele dikodi dinami. 25 Aki Yeso wenaka bolomba bon'anto baotutama la iyango, and'ophangolaki diphopho diko ina mindu, aolosangela ayandi, Nshokekemya mbo; Olaka m'el'andi, tutaki yotshwa nda botema bonandi. 26 Diphopho diyophaphangwaki, diyolengya phala, ko diko dilola; sheko dwel'ako aoyala shen'onto ombowa. Sheko banto eusa baosanga mbo; Andiko aowa. 27 Aye Yeso ondokataki la lo, aolwetola, ko andi aolemala. 28 Akiandi wotshwaka nda lodu, baeki banandi baolokomya na nkuku ayiyo, Sheleko ekiso toteya yoimola no? 29 Andi ondasangelaki mbo; Botong'one bopheyi yola phe nko nda yotsha la dikila toma.

30 Baolima m'aiko la baoleka na Ngalili; andi atolanga banto yeya djoi diko; 31 nd'itshina ina andi aolekya baeki banandi ayandi; Bona on'Onto aokosongolama nd'akata ban'anto l'iyo baokoodjaka. Ko andoodjakalom'iyo, alekalomi betsho esato, andi aokuta yetshwa. 32 Aye iyo batolimbitela djoi diko la iyo baolok'ophodu bonda youwula.

33 Iyo akundjwaki nda Kapenuma; akiandi nda lodu andi aolauwula mbo; Akinyo na mboka inyo lolikyana dikodi nda djoi dinkono? 34 Ko iyo baotshikala wee nd'itshina inda iyo baolikyana dikodi mbo; Bonkono ondiso bolecola bankina onene? 35 Ko andi aolilama la aoleta bonkama la baphe, la andi ondasangelaki ayandi, Nkin'onto alanga diyala nd'oso bon'ankina, andi akiteli bankina bya, m'okongo, ayali bonkambi bondiyo baumela. 36 And'aokola bon'onda itshila, aolila nd'atei andiyo; la andi aoolambola nda bakata banandi, aolasangela ayandi, 37 Bonto bonkono bokamba bona bonda itshila bonda shene nda dina inami aonambemi; la bonto bonambemi, aphonambemi ontulu, ko andi aolamba o l'One onsokolaki. 38 La Yoane ondosangelaki ayandi, Wekyi, tolana bonto oyadi yodyaka baphopho banda Satana nda dina indawe ko tolosuka nd'itshina ina andi aphotoyeli. 39 Aye Yeso osangaki ayandi, Lotoosukaki; l'oloko onda lak'onto bondokela djoi inda diphepha nda dina dinami bokeya dintola phwaphwa. 40 L'olok'onda bonto bophototoni ayadi dikambaka l'isho. 41 Bonto bya aokolokaya lophondo lond'ashi anda dimela djoi inda inyo loyadi basi Kilisito, soosolo ndolosangela ayemi, Andi aphongotshweya difuto dinandi. 41 Koko onto bya aokobanya iyana iphoko in'ane baonimedy, bolotshi bonandi

batshungyi diyoko dina inene na nkingu enandi, nkina boushe nda diyeke. 43 Nkina lo londawe loyadi ilunga ele we tenak'oko; yotshwa nda lomo euya dilekola yotshwa na Ngehena l'akata baphe olotshi; mpiko teya tophophophe. 44 (Bosopho bondiyo bophowu la tsha tophophophe) 45 Ko, nkina dikaka dindawe diyadi ilunga ele we, tenak'iko; yotshwa nda lomo otengumi dilekola yotshwa na Ngehena la bakaka andawe baphe olotshi; mpiko teya tophophophe 46 (Bosopho bondiyo bophowu nkoko la tsha tophophophe) 47 Nkina diso indawe iyad'ilunga ele we, oimole, oushe; yotshwa nda lomo la diso diphoko dilekola yotshwa na Ngehena l'aisho baphe olotshi. 48 Mpiko bosopho bondiyo bophowu la tsha tophophophe. 49 Djoï inda bonto bouma bokilamalomi bokwa bonda tsha, o la bolambo bouma bokilamalomi bokwa. 50 Bokwa boyadi bolotshi, aye ashila mpya end'okwa, boko bokoyala la mpya enkina ma nko? loyalaka l'okwa nd'etema eninyo, loyalaka o la wee nd'atei aninyo, bonto l'onto.

Tshapita 10

1 Andi aolima ma nkoko, aoyaka nda iyekele inda Yudiya nda wudi onda Yolodana, la belomba ben'anto baoyaka ditaana el'andi l'andi aoluta yaekya shene eki bokeledi bonandi.

2 Bafalise baoyaka el'andi nda yomeka, baolouwula ayiyo, Animola bonto wadi bonandi, andi aodjaka engembe shiko? 3 Andi ondauteyaki djoï ayandi, Mose aolokekemya sheleko? 4 Ko baosanga mbo, Mose aolimedya mbo; Akoti bonkanda onda didjaka diyala, nkina oimoli. 5 Yeso aoluteya djoï mbo; Andi okotaki engembe ene nd'itshina inda djongo inda betema beninyo. 6 Aye ma angolelo enda etongelo Nkumundjeyi ondatongaki dwele l'omoto. 7 L'oloko one dwele aokotshika ishe la nyango l'andi aokomamana la wadi bonandi; 8 sheko iyo bak'aphe baokoyala djongi diphoko. 9 Shene onto atatolak'ene eki Nkumundjeyi wamanyaka. 10 Akiyo wutaka yotshwa nda lodu baeki baolouwula djoï diko. 11 Ko andi ondauteyaki djoï ine ayandi, Onimola wadi bonandi, asongalomi'andi wadi bonkina, andi aokitsha l'andi mposa; 12 koko, nkina bomoto aotona bolomi onandi asonganalomiandi la dwele onkina o l'andi aokitsha l'andi mposa.

13 Iyo baoyela bana mpou el'andi in'andi yakata, aye baeki banandi baophangola baiko baolayela. 14 Aki Yeso wenaka djoï diko, andi aokona nkele, la aolasangela ayandi, Limedyaaka bana banda totshila bayaki el'emi; lotasukaki, l'oloko onda waphemelo bona Ndjambi boyadi bon'anto banda shene. 15 Soosolo nsholosangela mbo; bonto bya bophimedye waphemelo bona Ndjambi shenda iyana mpou aphongotshwa nkoko diiyo. 16 Ko andi ondakolaki nda belo benandi ko ondaphyaki bakata banandi, ondatonyaki insonyi.

17 Akiandi ayokendaka na mboka, bonto oyakaki el'andi, aluta, aoloshumedy baongo, aoluwula mbo, Wekyi bonda olotshi, diyadi l'emi dikela no in'emi dikita lomo lond'otshwako? 18 Yeso ondosangelaki ayandi, W'ondeta mbo, Bolotshi, la nki? Lako bonto ayadi bolotshi; bophoko boyadi olotshi, phe nko Ndjambi. 19 We yeyaka dingembe: Todjakaki bonto, tokitshaki mposa, tiyaki, totongelaki onto djoi, totshuyaki bonto, phikaka isho la nyongo. 20 Andi onduteyaki djoi ayandi, Wekyi emi okelaki baoi ane bauma ma iyana mpou inami. 21 Yeso aolophala tee, aolooka lolango, aolosangela mbo; W'osamba emba ephoko; kendaka we diyosombya djomba indawe bya, okaaka basi boola, sheko we okoyala la diyonga nda loola; ko oyaki ondjele. 22 Aye andi odyalengaki djoi inda lolaka loiko l'oloko on'andi ayaki nkolo ya baomba phala. 23 Yeso aokyakepha, aosangela baeki banandi mbo; diyadi djoi ind'oolo ankolo ya bayonga yotshwa nda waphemelo bona Ndjambi. 24 Baeki banandi aphephaki akiyo wokaka baoi banandi ane. Sheko, Yeso aoluta yasangela mbo, Bana, diyadi djoi inda boolo baiko baikama nda diyonga yotshwa nda waphemelo bona Ndjambi. 25 Yotshwelo ena ngamia nda itoko ina ntedi elekola yotshwelo end'okutshu nda waphemel'ona Ndjambi djoi inda'itshila. 26 Iyo baolekola dishashimwa, baoluwulana mbo, Sheko, bonto onkono okeya yika no? 27 Yeso aolaphala tee, aosanga mbo; Ele banto djoi dine dipheyi dikelama, aye dik'iphoyadi shiko ele Ndjambi.

28 Petero aolangola yosangela ayandi, Enaka isho tombotshika baoi bandiso bauma, tombokoyela. 29 Ko Yeso osangaki ayandi, Soosolo, nsholosangela ayemi, Bont'oumela ombotshika lodu, nkina bananyango band'ele, nkina bananyango banda aimato, nkina nyango, nkina ishe, nkin'ana, nkina basala nd'itshina inami, la ditshina inda bosako bond'olotshi; 30 nd'etambene, nda betsho ene, andi aokamba djomba boni boni, mbudu, l'ananyango anda bele, la bankana, la nyango, la bana, la basala, o la elu; ko nd'ekeki eokoya, and'aokamba lomo londa diiyo. 31 Ko eusa bayadi nd'oso baokokita m'okongo la baiko bayadi nd'okongo baokoleka nd'oso.

32 Iyo bayaki na mboka, basembi nda Yelushalema; Yeso aoleka nd'oso bondiyo; la iyo ashashimwaki, baoloka bophodu akiyo woyelaka. Ko andi okolaki bonkama boiko la baphe la aolangola yasangela baoi baongasa yokelama, mbo; 33 Lophalaka, tosembi nda Yelushalema ko baokokapha Bon'on'Onto el'aotshedi band'oso la akotshi ban'enkanda la iyo baokoophela nda bewedi, baokoolesa nd'akata band'asi benanga: 34 baokoosoka, la baokoetsha mpimbo, baokootonya lonsonyi, baokoodjaka; ko alekalomi betsho besato, andi aokutalomi yetshwa ma bewedi.

35 Yakobo la Yoane, bana banda Zebede, baoyaka el'andi, baosanga mbo;

Wekyi tolanga we ditokelela shene ekotshiso. 36 Andi aolauwula mbo; Dine djoji dilang'inyo emi dilokelela no? 37 Baosanga mbo; Imedyaka isho yilama la we, bophoko nda lo londawe londa bolomi, la bonkina nda lo londawe londa wadi, nda ditombya dindawe. 38 Aye Yeso ondasangelaki mbo; Iny'opheyi djoji ine indotshinyo. Inyo lokokusa dimela lophondo lokomel'emi, la yinama la mbatisa eninemi? 39 Iyo baolimedya mbo; Isho tokusa. Yeso ondasangelaki ayandi, Onde, inyo lokomela lophondo lomel'emi ko lokinama la mbatisa eninemi; 40 aye yilama nda lo lonami londa bolomi la nda lo lonami londa wadi, ipha djoji inami inda dikay'onto; aye yilama shene diyadi phe nko djoji inda baiko bakiyo aphonngelak'iko. 41 Aki baeki bonkama l'aphe wokaka djoji diko iyo baoloka Yakobo la Yoane nkele. 42 Ko Yeso aolaeta el'andi, aolasangela mbo, Inyo yeyaka mbo; Baiko baosonama inda yaphemela basi benanga bayadi bankumu bandiyo, la banto bandiyo ban'anene bayadi la mpipho nd'atei andiyo. 43 Ko apha shene nd'atei aninyo: aye bonto bondolanga diyala bonene nd'atei aninyo aokoyala bonkambi oninyo; 44 l'onto bondolanga dileka nd'oso oninyo aokoyala bontamba boninyo baumela. 45 L'oloko onda Bona on'Onto atoyaki in'anto yokambela, aye andi oyakaki diyokambela bankina bolimo la inda dilesa lomo lonandi boshikolelo bonda banto eusa.

46 Iyo baokundjwa nda Yeliko, ko akiandi wolaka ma Yeliko, andi la baeki banandi la bolomba bona onene bon'anto, bosoka Timayo dina inandi Batimayo, bosu iyou, aolilama nda bompandje bona mboka otsha djomba. 47 Akiandi wokak'iyu basanga mbo, Ale Yeso bosu Nasaleta, andi aolangola yusha dwela ayandi, Yeso, we Bosoka Davidi, ondok'ishei. 48 Banto eusa baolophangola mbo, Ilamaka wee; aye andi aolekola yusha dwela mbo, We Bosoka Davidi, ondok'ishei. 49 Ko Yeso aolemala aosanga ayandi, Letakandi. Ko iyo baoleta bosu iyou ayiyo, Kembyaka botema, emalaka, andi aketa. 50 Andi aolusha etoo enandi, aolemala phwaphwa aoyaka ele Yeso. 51 Yeso ondouwulaki mbo; Djoji dilangawe emi dikokelela no? Shene bosu iyou ondosingelaki ayandi; Wekyi bonami, baisho banami badiphwi. 52 Yeso ondosingelaki ayandi, Kendaka, yimedya endawe embokikya. Sheko, baisho banandi baodophwa phwaphwa la andi ondoyelaki na mboka.

Tshapita 11

1 Akiyo atutamaka nda Yelushalema nda Betaphadji la Betaniya, nda bokoto bond'Oleve, andi osokolaki baeki banandi baphe, 2 aolasangela mbo; Lokendaka nd'okphulaka botshutshi la inyo; ko akundjwal'inyo lokenalo iyana ya mpunda itshungi, la iko itaphemi bonto; lootshongolaka, looyelaka el'emi. 3 Nkina bonto aokoluwula mbo, Iny'okela sheleko? Losangaka mbo, Nkolo elengana l'iko, ko andi aokoosokol'ane phwaphwa. 4 Iyo akendaki, la

iy'anenaki iyana ina mpunda itshungi na mbok'end'akusa; iyo atshongolak'iko. 5 Amodi andiyo bemi mpiko baoluwula mbo, Akel'inyo no? Lolembola iyana ya mpunda sheleko? 6 Ko iyo baolasisela djoi diki Yeso wasangelaka; sheko iyo baolalesa dikela. 7 Iyo baoyaka la iyana ya mpunda ele Yeso, baolaphya nda bokongo bond'iko, la andi aolaphema nd'adiko and'iko. 8 Banto eusa baotanola itoo indiyo na mboka, la bankina baotanda baundja bana nkashi bakiyo atenaka ma disala, ko shene iyo andatshangolaki na mboka. 9 Baiko alekaki nd'oso onandi l'ankina andoyelaki m'okongo baolila dwela mbo; Osana, ditombya ele One boyaka nda dina ina Nkolo. 10 Ditombya diyali nda waphemelo bondoyoyi ond'apha endiso Davidi; Osana nda etetenyi elekola nd'adiko. 11 Andi aolotshwa nda Yelushalema la nda tempelo: akiandi akyakephaka nda djomba diuma diki nkoko, andi okendaki la baeki bonkama la baphe nda Betaniya, djoi inda wina bongasa yila. 12 Bomo wina, akiyo ayakaka ma Betaniya, andi aoloka ndjala. 13 Akiandi wenak'osongo bona mfingu ma itatali boki la nkashi, andi otutamaki nd'oko mbo; Manga ndokotana mammo nkoko. Akiandi ayakaka nd'oko andi onenaki nko nkashi intulu, boloko onda eshile ena mfingu etophokoka. 14 Andi aolutey'oko djoi ayandi, Bonto atoleki mammo indawe ma win'one botshwako. Baeki banandi baoloka djoi diko. 15 Iyo baoyaka nda Yelushalema l'andi ondotshwaki nda tempelo, aolangola yita baiko baosumbya l'aiko baosumba mpiko, aokadimola ntonda in'aengodi banda falanga o la bekala ben'anto basumbyaki mpuru inda emenga, 16 l'and'atimedya bonto dileka nda tempelo atodya mpoki. 17 An'ondaekyaki, osangaki mbo, Iyo akotaki mbo, Baoketa lodu lonami mbo, Lodu londa benanga bya yotsha Ndjambi! Aye iny'ombolophilola djoka inda baphonodi. 18 Baotshedi band'oso o la bakotshi ban'enkanda baoloka lolaka loiko, ko iyo baolasa djowa inda yophita; aye iy'aoloka bophodu nd'itshina inda wekyedi onandi bophephyaki bolomba boumela bon'anto. 19 Ko nda dikolo andi aolola ma bola. 20 Akiyo alekaka na mboka n'ama nkesa, iyo anenaki bosongo bona mfingu bolomwa bya ma edju end'oko. 21 Sheko Petero ondophwaki djoi diki Yeso asangaka, l'andi ondosangelaki ayandi, Wekyi, phalaka, bosongo bona mfingu bokiwe wambakalomi boshila yolomwa. 22 Yeso ondasangelaki ayandi, Limedyaka Nkumundjeyi. 23 Ndolosangela ayemi, Bonto bya bokokekemya bokoto bone mbo, Imaka, ushami nda diyeke, la aphokakani nd'otema bonandi, aye aokimedya ayandi; Djoi ine indotshemi diyokokelama, diko dikokelama el'andi. 24 Dika diko nsholosangela ayemi, Djoi diuma indotshinyo nda yotshelo ininyo, limedyaka mbo, Tokaya, ko diko dikokelama djoi ininyo. 25 La anemala inyo nda yotsha, Nkina loyadi

l'onto bomodi djoï, loophophedyak'iko; ko Isho eninyo eyadi nda loola aokolophophedya bembe beninyo. 26 Aye, nkina inyo loophophedyi bankina bembe bendiyo, Isho eninyo eyadi nda loola aphonolophophedya bembe beninyo.

27 Iyo baoluta diyaka nda Yelushalema. Akiandi atshatshilaka nda tempelo, baotshedi band'oso la bakotshi ban'enkanda la dingambi din'anto baoyaka el'andi. 28 Iyo andouwulaki mbo, W'okela baï ane na mpipho ena no? La bone bondokokaaki mpamba enda dikela baï ane, andi no? 29 Yeso ondasangelaki mbo; Emi ndokoluwula bouwul'ophoko; londuteya djoï la emi ndokolosangela ina mpipho enami enda dikela baï ane. 30 Mbatisa enda Yoane eko eyadi ma loola nkina m'el'anto? Londuteyi djoï. 31 Iyo baokakana nda betema endiyo mbo; Nkina tokosanga mbo; Eko ma loola, andi aokutola djoï mbo; Koko sheleko ekinyo lotoimedya? 32 Ko nkina tokosanga mbo; M'el'anto, iyo baoloka bophodu nd'itshina inda banto bauma baolimedya Yoane mbo, Ale bosangi bonda soosolo. 33 Ko iyo baoluteya djoï mbo, Isho topheyi. Ko Yeso ondasangelaki mbo; O la emi mpongolosangela djoï ina mpipho enami enda dikela baï ane.

Tshapita 12

1 Andi aolangola yatela nshawu ayandi, Bonto ononaki disala inda bokodi bonda vinyu, la andi osamanyaki dikandu l'andi otshimaki diphukphu inda yama vinyu; l'andi oshumyaki lodu lond'etali londa ephalelo; andi otshikak'eko nd'akata ban'ankambi, aokenda n'onanga bonkina. 2 Ko aki etamba ena mammo akokaka andi osokolaki bontamba bonandi diyokola mammo inda disala m'ele bankambi. 3 Aye iyo andokandaki, andokphulaki, anduteyaki bakata phululu. 4 Andi aoluta yasokola bontamba bonkina, ko baoloka bayoko nd'otsha, baolita la ditola. 5 Sheko andi osokolaki bonkina la iyo andodjakaki; o la bankina eusa; iy'akphulaki bamodi, baodjaka bankina. 6 Ko, and'ayaki la bon'onandi dikinda bokiandi alangaka, l'andi ondosokolaki ele iyo nd'esuka, ayandi, Iyo baokomemya bona onami bonda dwele. 7 Aye bankambi basoko baosangelana ayiyo; Bone oyadi bokitshwa; lontshokoko toodjaki la bokitshwa okoyala bondiso. 8 Sheko iyo andokandaki, andodjakaki, baoolusha ma disala. 9 Sheleko ekakelelalom nkolo ya isala? Andi aokoyaka diyodjaka bankambi basoko, aokolesa disala nda bakata ban'ankina. 10 Inyo lotaloli djoï ine nda dikotelo inda ekila? Diyoko diki bashumyi banda lodu atonaka, 11 Dine dimboyala nda botsha bona intshingu. Ndjadiako aokokelalomi shiko. La djoï ine iyadi djoï inda diphepha nda baisho bandiso. 12 Ko iyo baolasa yokanda, aye iyo baoloka bolomba bon'anto bophodu; l'olok'onda iy'aoleya mbo; Andi aototela nshawu ene; ko iyo andotshikaki akendaki.

13 Iyo asokolaki Afalise bamodi o la basi Elode diyokanda nd'atephelo banandi. 14 Akiy'ayakaka ele andi baolosangela mbo; Wekyi, isho yeyaka mbo, We oyadi o soosolo, w'ophoki bonto bophodu; w'ophoyadi la isonodi, aye w'oyadi dilakaka banto djoi dina mboka ena Nkumundjeyi o phululu; otosangelephele nkina ayadi olotshi dilambola Kaisa bolambo nkina lako; 15 toolamboli nkina totoolamboli? Aye andi aoleya bodimba bondiyo la andi aolasangela ayandi; Sheleko enkutshinyo? Loyelaphele denario, nkina nene. 16 Iyo ayakaki la eko. Andi ondauwulaki mbo; diwanya ine dina no? La ekotelo ene ena no? Iyo baolamba ayiyo, Banda Kaisa. 17 Yeso ondasangelaki ayandi, Lokaaka Kaisa djomba inda Kaisa; lokaaka Nkumundjeyi djomba dina Nkumundjeyi. Iyo baolekola diphepha nda djoi inandi.

18 Ko Basadoke bayakaki el'andi; iyo bayadi disangaka mbo; Yetshwa en'anto ma bewedi ephoyadi. Iyo andouwulaki mbo, 19 Wekyi, Mose otokotelaki mbo; Awalomi bonanyango bonda dwele, alesalomiandi wadi atophota bona, diyadi la bonanyango disonga wadi bonandi la yotela bonanyango bondowaki bana. 20 Koko bele nsambo benda botema bophoko bakiako; botomolo bondiyo osongaki wadi aye dwele awaki, ko atoti bona; 21 la bonda aphe okolaki wadi bonandi la andi awaki, l'atoti bona; o la bonda asato, phe nko shiko. 22 Shene iyo bak'auma nsambo baolokola, batoti ona. Akiy'awaki bya, bomoto awaki o l'andi. 23 Nda yetshwelo ma bewedi, andetshwalom'iyo, andi aokoyalalomi wadi ona no l'oloko ona andi oyalaki wadi ondiyo ako nsambo? 24 Ko Yeso aoluteya djoi, aosanga mbo; Sheko inyo lophungi, djoi ina inyo lopheyi ekotelo nkina mpamba ena Nkumundjeyi? 25 Nd'itshina ina nda win'ondetshwalom'iyo ma bewedi, iyo baphongosongalomi badi, l'iyo baphongosongama: bayadi shen'andjelo banda loola. 26 Ko inda bawaki la yetshwa endiyo, inyo lotophalola nda bonkanda bona Mose nda etetenyi enda dundja, sh'eki Ndjambi wosangelaka mbo, Emi ndjadi Ndjambi end'Abalama la Ndjambi enda Isaka la Ndjambi enda Yakobo? Ko andi aphoyadi Ndjambi enda bawaki, aye andi ale Ndjambi end'aiko bale la lomo: sheko inyo lolekola yunga.

28 Bokotshi omodi bonda benkanda ondokundjwaki nkako, aoloka akiyo wikyaka dikodi, la andi aoleya mbo; Yeso aoluteya bouwula bondiyo la mpima l'andi aelokomya mbo; Engembe esolekola dingembe diumela no? 29 Yeso aolamba ayandi, Engembe end'oso ende shene mbo; Basi Isalele, lokodyaka: Nkolo Ndjambi endiso eyadi ephoko. 30 Diyadi la we dilanga Nkolo Ndjambi endawe la botema bondawe bouma, o la lomo louma, o la mpima endawe euma, o la mpamba endawe we euma. Engembe end'oso eko ene. 31 Engembe enda ephe nko ene mbo, Diyadi la we dilanga win'awe nko

shene eyalangawe. Lako engembe esolekola dingembe dine onene. 32 Bokotshi ondosangelaki mbo; Onde, Wekyi, we ombotephela nko soosolo, l'olok'ona Ndjambi nko ephoko, lako enkina nk'andi. 33 Yooka lolango la botema bouma, o la mpima euma, o la lomo louma, o la mpamba euma, la yoka bontshutshi bondawe lolango shene eyaokawe lolango elekola belambo benda ditshumba beuma, la bekakaya bya. 34 Aki Yeso wenaka mbo; And'aoluteya djoi la mpima, andi ondosangelaki mbo, W'ophoyadi etali ma waphemelo bona Nkumundjeyi. Aki baoi ane ashilaka, lak'onto boki la ntepho enda yuta yuwula bouwula.

35 Aki Yeso wekyaka banto nda tempelo, andi aolauwula mbo; Bakotshi ban'enkanda basanga mbo, Kilisito ayadi Bosoka Davidi sheleko? 36 Davidi o mele, atephela ma Nyuma end'Olotshi osangaki mbo; Nkolo osangelaki Nkumu enami ayandi, Ilamaka nda lo lonami londa bolomi, elengi ndi anambyalomiyemi bantonyi andawe N'ase banda bakaka bandawe. 37 Davidi andi o munge aoleta mbo, Nkumu; ko andi ale bon'onandi sheleko? Ko bolomba ona onene bona anto baoloka botephelo bonandi l'oshadu.

38 Ko nda wekyedi bonandi andi ondasangelaki mbo; Lephwak'akotshi ban'enkanda; iyo bashashala ditshatshila balotshi itoo inda etali, balanga banto yasasa nda baoka, 39 la bokala bond'oso nda etombolelo, o la itetenyi ind'oso nda balambo: 40 koko, iyo bayadi diphonolaka mbudu inda baadi baki bedwo, la bayadi yotshaka yotshelo inda itatali otshotsha. Bane baokopheloma lophedi lolekola onene mele.

41 Andi ondilamaki nd'oso onda bokombo, la andi onenaki shene eki banto wilaka bakuta nda bokombo: basi baongo phala baolil'akuta eusa nkoko. 42 K'omoto, bos'oola, wadi oki bodwo aolotshwa; andi ondilaki bakuta baphe nkoko bayaki phe nk'iyedi inda sushi. 43 An'ondetaki baeki banandi la andi ondasangelaki mbo; Soosolo, ndolosangela ayemi, Djomba diki wadi oki bodwo one bond'oola wilaka nd'okombo dilekola diki ankina bya wilaka nd'okombo. 44 Djoi ind'iyo bauma baolila ma djomba indiyo phala aye bomot'one ma boola bonandi aolila bya ekiandi nkoko, ayawe, djomba dinandi diuma.

Tshapita 13

1 Akiandi wolaka m'etombolelo weki bonandi omodi ondosangelaki mbo; Wekyi, phalaka bokeledi bonda bayoko l'ona mbudu! 2 Ko Yeso ondosangelaki mbo; W'ophene mbudu ine in'anene? Lako diyoko diyokotshikala nd'adiko anda dinkina; diko diyokushama n'ase bya. 3 La akiandi wilamaka nda bokoto bonda Oleve, nd'os'onda etombolelo, Petero la Yakobo la Yoane la Andele andouwulaki nd'ishimo ayiyo; 4 Otosangele wina boyakalomi baoi bane, nimba enkono ekenya andasalomi baoi bane

dikokyama? 5 Koko Yeso aolangola yasangela mbo; Lephwaka, bonto ophoyolungusanya. 6 L'olok'onda banto eusa baokoyaka nda dina dinami, baokosanga ayiyo, Emi nde nk'andi, la baoketedyalomi anto phala. 7 Aye andokalominyo baoi and'eshela la besako bend'eshela, lotoshashimwaki; l'oloko onda diyadi la baoi ane dikelama aye esuka etophoyaka. 8 Djoji inda bonanga bokuna la bonanga boshela la waphemelo bokuna la waphemelo boshela; motshi iyokophukyama l'etetenyi l'etetenyi; ndjala in'enene iyokoyala na motshi; baoi bane bayadi nko angolelo ena nkonyo. 9 Ko inyo, lephwaka bolotshi, nd'itshina inda iyo baokolekya el'esambi endiyo la nd'etombolelo endiyo. Inyo lokokphulama, la inyo lokokundodyama nd'oso onda bakphulaki la baphemedi djoji in'emi; la inyo lokoyala baenyi el'iyo. 10 Ko diyadi la bosako ond'olotshi disambedyama n'enanga beuma nd'oso. 11 Aye alolokody'inyo inda dilolesa nd'akata band'iyo, lotokanedyaki mpima nd'oso mbo, Tokosangela no? Aye lokokayama djoji inda ditephela nda wina boiko, lotephelaka djoji diko; nd'itshina ina inyo lophotephele, aye Nyuma end'Olotshi mele atephele. 12 Ko bona nyango aokokapha bona nyango nd'ewedi; ishe aokokapha bona bonandi; bana baokolephodya baotshi bandiyo, baokadjaka. 13 Banto bya baokoloka bosudu djoji inda dina dinami; ko bonto bokotshidingana elengi ndi esuka aokika.

14 Ko anenalominyo londjo londa diphita ambi nda djowa epha end'eko, (ondalola baoi ane, kela andi akanedye mpima), ko basoko bale nda Yudiya baluti nd'ekoto. 15 Bonto bondoyadi nd'adiko anda lodu, atokitelaki, atotshwe nd'atei anda lodu lonandi diyokol'emba ma nkoko; 16 bonto boyadi nda disala, atuti diyokol'etoo enandi enda itou. 17 Ko elu ena onene ekoyaka el'aiko bale la baemi l'aiko balomya bana baele nda betsho beiko. 18 Lotshaka Ndjambi mbo, Diluta dindiso ditoyali nda bowa bona mpyo. 19 Nd'etsho eiko elu en'onene ekoyala; ma angolelo end'etongelo eki Ndjambi atongaka motshi, elengi ndi etambene elu enda shene etoyala, la ephonguta diyala nko shene. Ko, etoyala Ndjambi atotshutsha betsho beiko, tshika lako bonto bokosukama. Aye l'olok'onda basonami akiand'asonaka andi aokotshutsha betsho esoko. 21 Ko nkina bonto aokolosangela mbo; Phalaka, Kilisito ayadi ane, nkina, Andi ayadi mpene; lotimediyaki. 22 Djoji inda bakilisito banda batshuya baokenyalomi, o la basangi banda bephoto, baokotshumya banto dishile la baoi banda diphepha djoji inda dikesula o la basonami, nkina djoji inda shene dikoka dikelama. 23 Ko lephwaka, lophalaka; nsholosangela baoi ane baumela nd'oso. 24 Ko nda betsho eiko m'okongo onda elu eiko wina bokophidwa widima la nshongi ephongopheta; 25 totshi tokokwa ma loola l'asi mpipho anda loola baokophuphungana. 26 Nd'etamba esoko baokenalomi Bon'on'onto ayakalomiani nda elenga la

mpamba en'onene la ditombya dina onene. 27 Andi aokosokola bandjelo banandi, la iyo baokoyotanya basonami banandi ma diphelele dinei, ma esuka ena motshi elengi ndi esuka enda loola.

28 Ko lekaka nshawu end'osongo bona mfingu; alemba etaphi end'oko iyodu, andodyalom'oko nkashi leyaka mbo, Betsheo benda tshwani betutama.

29 Shene o la inyo, anenalominyo baoi bane bakelama, leyaka mbo; Ayadi ntutama, ayadi nda yisho. 30 Soosolo, nsholosangela ayemi, Lotshwelo lone lophongoshila elengi ndi baoi bane bya baokoshidiyama. 31 Loola la motshi iyokoshila, aye baoi banami baphongoshila diiyo. 32 Ko djoji inda wina boiko nkina boshidi boiko, lak'onto ondeya; lako bandjelo banda loola, lako Bona, phe nko Apha, o munge yeyaka. 33 Lephwak'inyo, lophalaka, lotshaka djoji ina inyo lopheyi ayakalomi wina boiko. 34 Diyadi shen'onto ondokendaki n'onanga bonkina; andi otshikaki lodu lonandi, okaaki bantamba banandi mpipho, alesaki bonto bolimo bonandi, bonto bolimo bonandi; l'andi okekemyaki bophadi onda wisho mbo, Phalak'olotshi. 35 Shene, lophalaka, djoji ina inyo lopheyi wina boyakalomi Nkolo ya lodu; nkina nda dikolo, nkina nd'akole, nkina andeka nkoko enda bolomi, nkina n'ama nkesa; 36 manga andi aokoyaka ishashimudi, aphoyolotana nda ilo. 37 Sheko djoji dilosangel'emi mbosangeka banto baumela mbo; Lophalaka.

Tshapita 14

1 Aki betsho ephe alekaka, eyalaki dilambo dinda Yeta ena Ndjadiako, o l'inda dila toma topha la yudya; baotshedi band'oso l'akotshi ban'enkanda baolasa yokanda la loongyo la yodjaka. 2 Aye iyo asangaki mbo, Totokeli shene nd'etsho bend'ilambo, lophoso lophoyoyala nd'atei ban'anto.

3 Aki Yeso nda Betaniya nda lodu londa Simone, (andi oki la bangendji) ko akiandi wetamaka nda lotonda, bomoto oyakaki la ikutshu ind'alabasata iki la malas'enda botshiya bond'oolo nkoko; andi aobuniko, aoluteya malasa nd'otsha bonandi. 4 Ko bamodi baokona nkele, l'iyoy asangaki nda betema bendiyo mbo; Sheleko eki andi aphitaka malasa shene? 5 Elekol'olotshi disombya malasa l'otshiya bolecola denario yoni besato la dikaphela basi etshila. Iy'aongwangunela bomoto shene. 6 Aye Yeso osangaki ayandi, Lambedyakandi; inyo loophukya la nki? And'aonkelela bolimo bonda bolotshi. 7 Inyo loyadi la bas'oola nd'atei aninyo betsho beuma; ko nkina inyo lolanga, inyo yeyaka yakelela olotshi; ko inyo lophoyadi la emi nd'atei aninyo betsho beuma. 8 Andi aokela shen'ekiandi akusaka dikela. Andi aoluteya malasa nda djongi dinami nd'oso batophonkunda. 9 Soosolo, ndolosangela ayemi, Nda ditetenyi diuma dina motshi, mpene esambedyalom'iyoy bosako bone bonda bolotshi, iyo baokasangelalomi djoji ine diki bomoto one akelaka, ina andi yophwama.

10 Ko Yudasi Isakaliote, bomodi bonda bonkama la baphe, okendaki el'aotshedi and'oso inda yosongola el'iyo. 11 Akiyo wokaka djoi diko iyo baoshashala, baolotangya baumba. Sheko, andi aolasa djowa inda bolotshi inda yokapha.

12 Aki wina bond'oso bona mampa ipha la yudya akokaka, ayadi iyo didjakaka bona bon'onkoko bonda Yeta ena Ndjadiako, baeki banandi andouwulaki mbo; Wudi oleko bolanga we isho diyophonga onda we dila toma tonda Yeta ena Ndjadiako? 13 K'andi osokolaki baeki banandi baphe, ondasangelaki mbo; Lokendaka nd'ola, ko dwel'omodi okophomana la inyo, atodya ekutshu end'ashi; looyelaka. 14 Sheko mpene endotshwal'andi, losangelaka nkolo ya lodu mbo, Wekyi asanga mbo; Dilako dinami dileko mpene elal'emi Yeta ena Ndjadiako, emi la baeki banami? 15 Andi o mele aokolotshumya ikute in'onene ina nd'adiko, la djomba diuma disambiso. Lotophongele nkoko. 16 Baeki anandi akendaki, la iyo akundjwaki nda bola, baolena shen'ekiandi wasangelaka, la iyo aphonngaki toma tonda Yeta ena Ndjadiako.

17 Nda dikolo Yeso aoyaka la baeki bonkama la baphe. 18 Ko akiyo wetamaka nda lotonda bala toma, Yeso osangaki ayandi, Soosolo, ndolosangela ayemi; Bomodi oninyo aokonsongola; andi ayadi ane, ala la emi toma. 19 Iyo baolangola didyalenga, baokomyakomya bonto l'onto, ayiyo; Al'emi? 20 Aye andi aolauteya djoi ayandi; Ayadi bomodi bonda bonkama la aphe bondotshupha l'emi lo lonandi nda dilongi. 21 Onde, Bona bon'Onto aokokenda sh'ekiyo akotaka djoi inandi, aye wambo ele bonto boiko bokokapha Bona bon'Onto; otolekol'olotshi nkina bont'oiko atotshwe. 22 Akiyo alekaka toma, Yeso okolak'omaka bona mampa aootshwakola insonyi, aotena oko l'andi aolakaya, aosanga ayandi, Lokolaka one; bone oyadi djongi inami. 23 Koko, andi okolaki lophondo, la akiandi wuteyaka elunga, andi aolakay'oko, ko iyo baoomela. 24 Andi ondasangelaki ayandi, One oyadi bolungu bonami bonda ekotelo end'oto bokwela banto banto phala. 25 Soosolo, nsholosangela ayemi, Emi mponguta dimela bashi ana mammo inda vinyu elengi ndi wina bondutalom'emi yomela nda waphemelo bona Nkumundjeyi. 26 Akiyo wimbaka lwembo iyo akendaki nda bokoto bonda Oleve.

27 Yeso ondasangelaki mbo; Iny'ouma lokobanalo, l'oloko onda iyo akotaki mbo, Ndokophoma wumbi, la benkoko beokotshangwa. 28 Aye andetshwalomemi, ndokokenda nd'oso oninyo na Ngalili. 29 Ko Petero ondosangelaki mbo; Nkul'ankina baumela baikobanalo, ko apha emi. 30 Aye, Yeso ondosangelaki ayandi, Soosolo, nshokosangela mbo; Wina one, nd'oso ona nkoko enda bolomi eteki yeka ephe, nko botsho bone, we

okonangana yangana esato. 31 Aye andi aolekola disanga la lolaka londa boolo mbo; Nkina diyadi l'emi diwa la we, mpongokangana. La iyo bauma baosanga nko phyophyo.

32 Ko iy'akundjwaki nda djowa ikiyo wetaka mbo; Ngetesemena, la andi osangelaki baeki banandi mbo; Lilamaka ane nkina emi ndoyotshe Ndjambi.

33 Andi okolaki Petero la Yakobo la Yoane l'andi, aolangola diphepha boolo, la botema bonandi boki la lokonyo phala. 34 Andi ondasangelaki ayandi, Botema bonami bolecola la didyalenga shena nda iwa; lotshikalaka ane, lophalaka.

35 L'andi aoyokenda ishishi nd'oso, aokukumala na motshi ko andi aolotsha Nkumundjeyi mbo; Nkina w'olanga, ondekye phele boshidi one.

36 La andi ondotshaki mbo; Aba, Apha, w'ole la mpamba enda dikela baoui baumela; onimodye empudi ene enda wina; aye, apha shene elang'emi; djoii ine dikelami shene elangawe.

37 Ko andi aoyaka, aolatana betshi ilo, aosangela Petero mbo; Simona, w'ombetama ilo? Sheleko w'opheyi diphala boshidi ophoko onda wina?

38 Lephwaka, lotshaka Ndjambi, inyo lophoyotshwa nd'aoi band'atshuya; soosolo botema ole la mposa ko djongi diyadi nko iyodu.

39 Andi okendaki, aoluta yotsha Nkumundjeyi la baoui nko phyophyo. 40 K'andi aoluta diyaka, aolatana betshi ilo nd'itshina inda baisho bandiyo bayaki bodito; la iyo bateyi yuteya djoii.

41 Andi aoyaka boyaka ond'asato, aolasangela mbo, Loshongetama ilo, lutshaka. Etambene, boshidi bokoka; lophalaka, Bona bon'Onto ombosongolama nda bakata and'akedi ban'embe.

42 Ludwaka, lontshokoko tokende; bokaphi ombotutama. 43 Ko lako elengi, akiandi atephelaka, Yudasi, bomodi bon'onkama la baphe aoyaka, la bolomba bona onene baoyaka l'andi la mbau la tongondjwa, m'ele baotshedi band'oso la bakotshi banda benkanda o la dingambe.

44 Ko bokaphi bonda Yeso ondakaaki nemba nd'atei andiyo l'andi mbo, One bolomana emi l'andi berumvu, nk'andi; lokandaka andi lotombaka andi la wanya.

45 Sheko akiandi ayakaka, andi otutamaki la andi phwaphwa, osangaki mbo; Wekyi, Wekyi; ko andi aolomana l'andi berumvu. 46 Iyo baoolaphya bakata bandiyo la baolokanda.

47 Aye bomodi bonda baiko bolemala ntutama aosomola mbau enandi aotena ditoo dinda bontamba bonda botshedi bond'oso.

48 Ko Yeso ondauwulaki mbo; Inyo loyaka la mbau la tongondjwa diyonkanda shene ekandinyo bophonodi, sheleko? 49 Emi ndjaki la inyo la wina la wina nda etombolelo nda dilakak'anto la inyo lotonkanda; aye baoui bane baokelama inda dikokya baoui baokotama nda dikotelo dinda ekila.

50 Ko iyo bauma baolotshika, baoluta. 51 Bolangala bonda dwele bomodi aoloyela, okukaki botaka bonandi la etoo enda amerikani; sheko iyo andokandaki.

52 Ko andi otshikaki etoo enandi enda amerikani nd'okongo, olutaki botaka.

53 Iyo akendaki la Yeso ele botshedi bond'oso mele. Ko baotshedi bana anene baumela, la dingambe la bakotshi ban'enkanda baotaana el'andi. 54 Koko, Petero ondoyelaki nda itatali elengi ndi ikandu inda lodu londa botshedi boki nd'oso onda baotshedi ankina: andi ondilamaki la benyampala, aoloka teya la nyumba inda tsha.

55 Baotshedi anda oso la ekoka enda dingambe eumela baolasa boloko bonda diyomama Yeso inda yodjaka, aye iyo bateya yishola djoi. 56 Baenyi and'ephoto andomamaki, aye baoi bandiyo batelama phyophyo. 57 Bankina bandiyo baolemala, baolomama boloko mbo; 58 Isho tolooka asanga ayandi, Ndokotshangola etombolelo ene ekiyo ashumyaka l'akata; ko alekalomi betsho besato, emi ndokoshumya enkina apha la bakata. 59 Aye baoi bandiyo batelamaki. 60 Botshedi boiko oki nd'adiko ana ankina aolemala nd'oso ondiyo bya, onduwulaki Yeso mbo, We ophuteyi djoi? Ko djoi dine disanga baenyi ane ile nko shiko? 61 Andi otshikalaki wee, atutola djoi. Botshedi bond'oso ondutaki youwula mbo; W'oyadi Kilisito, Bon'ona One omemyami? 62 Ko Yeso aolamba ayandi, Nde nk'andi; ko lokenalomi Bon'on'Onto ondudi nda lo londa olomi lona mpamba, ko ayoyi la balenga banda loola. 63 Sheko botshedi bond'oso ondataki ditoo dinandi, la andi osangaki ayandi, Tase baenyi enkina la no? 64 Inyo lomboka ditonyi ditol'andi Ndjambi. Lokanedyia sheleko? Ko iyo bauma andophelaki, baosanga ayiyo, Andi aokoka diwa. 65 La ankina baolangola yotonya lonsonyi la dikuka elungi enandi la yophum'akophi, la yosangela djoi mbo; Tephelaka botephelo. Koko, benyampala andokphulaki mpakata.

66 Ko aki Petero n'ase nda ikandu, bomo bonda baimato, bonkambi bonda botshedi bond'oso oyakaki. 67 Akiandi wenaka Petero, oka tsha, an'ondophalaki tee, ondosangelaki mbo; O la we oyaki la Yeso bosu Nasaleta. 68 Aye andi onanganaki mbo, Emi mpeyi la emi mpophokwe djoi ditephelawe; la andi ondolaki, okendaki nda esambe; ko nkoko end'olomi eleka. 69 Bonkambi bon'omoto aoluta yena aolangola disangela baiko anemalaki mpene mbo; Dwele one ayadi bomodi bondiyo. 70 Aye andi aoluta yangana. Lako elengi, baiko banemalaki baoluta disangela Petero ayiyo; Soosolo w'oyadi bosu okiyo, l'oloko onda we oyadi bosu Ngalili. 71 Aye andi aolangola yamba wambo la dishimba nshimbi mbo; Emi mpeyi bonto one bosanga inyo. 72 Ko nkoko end'olomi eleka weka bond'aphe. La Petero aolophwa djoi diki Yeso wosangelaka mbo, Nd'os'ona nkoko end'olomi eteki yeka ephe, we okonangana yangana esato. Akiandi akanedyaka mpima enda djoi diko andi olelaki basodi.

Tshapita 15

1 N'am'inkenkesha baotshedi ban'anene baodinga ekoka phwaphwa, la

dingambe l'akotshi ban'enkanda, la balokodi bauma, baolemba Yeso, la iyo akendaki l'andi, andolesaki nd'akata banda Pilata. 2 Pilata ondouwulaki mbo; W'oyadi Nkumu end'asi Yuda? Yeso aolimedya mbo; Ayadi phe nko shene ekelawe. 3 Baotshedi band'oso andomamaki beloko phala. 4 Ko Pilata aoluta yowula mbo; We ophuteyi nkula djoi? W'ophoki baoui eusa bakomamiyo? 5 Aye Yeso atutola djoi; sheko Pilata aolekola diphepha. 6 Nd'ilambo andi aki la bokeledi onda yalesela osi lonkandju omodi bondotshiyo. 7 Ko onto okiako, dina dinandi Balabasi, botshongami l'ankina baolungesana l'andi; andi odjakaki banto nda wungesanyi boiko. 8 Bolomba bon'anto baotutama el'andi la iyo baolangola yotsha mbo, Otokeleli shenda bokeledi bondawe bokiwe atokelelaka. 9 Pilata ondauteyaki djoi mbo; Inyo lolanga emi dilolembola Nkumu enda basi Yuda? Nd'itshina in'and'aoleya mbo, Baotshedi band'oso baolokapha djoi inda luwa. 11 Baotshedi ban'anene akembyaki banto inda iyo yootsha mbo, Batolemboli Balabasi. 12 Pilata ondauteyaki djoi mbo; Nkeleli bonto bondet'inyo ayinyo, Nkumu enda basi Yuda, sheleko? 13 Iyo andutaki diphaphangwa mbo; Djakaka andi nda bosongo bona ndekesanya. 14 Sheko Pilata ondauwulaki mbo; Sheleko, andi aokela djoi in'ombe dinkono? Aye baophinda diphaphangwa mbo, Djakaka andi nda bosongo bona ndekesanya. 15 L'oloko onda Pilata olangaki dishashadya bolomba bon'anto, andi aolalesela Balabasi; shene akiandi wetshaka Yeso mpimbo andi aololesa ind'iyoyodjaka nda bosongo bona ndekesanya.

16 Basoda baoyaka l'andi nda ikandu mpene eki etetenyi enda bokphulaki, baotaanya bolomba bonda basoda baumela nkoko. 17 Iyo baololotsha etoo enda itou ena ngula, baotshunga dikuka dinda baeke, ko baolaphy'iko nd'otsha onandi. 18 Baolangola yosasa mbo; We Nkumu enda basi Yuda, wiiko! 19 La iyo baolokphula nda botsha la dilanga, o la baolotonya lonsonyi, baoloshumya baongo andiyo baoloshima. 20 La akiyo wosokaka, baolosusula etoo ena ngula la aoluta yolotsha itoo inandi mele, baikenda l'andi inda iyodjaka nda bosongo bona ndekesanya. 21 Ko, Simona, ishe enda Alesanda la Rufu, bosu Kolene, akendaki na mboka, ayoyi ma boswe; baolokanda ina andi ditodya bosongo bonandi bona ndekesanya. 22 Baoyaka l'andi nda etetenyi endet'iyoyodjaka mbo; Ngolangota; dikadimola nda lolaka londiso mbo; Djow'inda lokango lon'onto. 23 Iy'aolokaya baana bakiyo asophaka la bote bonda bolulu, aye andi atomel'ako. 24 La akiyo wophanyaka nda bosongo ona ndekesanya, baikaphana itoo inandi, baota indjeke inda yeya etate ekokola bonto l'onto. 25 Ko aki boshidi onda asato akokaka, iyo andophanyaki nda bosongo bona ndekesanya. 26 Iyo akotaki boloko bokiyo womamaka nd'adiko anandi mbo; Nkumu enda basi Yuda. 27

La iyo aphanyaki baphonodi baphe l'andi, bophoko nda lo lonandi londa bolomi, l'onkina nda lo lonandi londa wadi; 28 (sheko ekotelo eokokyama endosanga mbo, Andi aoleledyama eteny'ephoko la yengesanyi.)

29 Baiko baoleka na mboka baolotola, baophukya betsha bendiyo, baosanga mbo; Onde! We ondotshangola etombolelo l'onduta yoshumya nd'etsho esato, 30 oyaikyaki; kitelaka ma bosongo bona ndekesanya. 31 Baotshedi band'oso baolutola, iyo l'akotshi ban'enkanda, baosanga mbo, And'iko ondosukaki bankina ko and'apheyi diyasuka. 32 Kilisito, Nkumu end'asi Yuda, akiteli ma bosongo bona ndekesanya inda isho yena la yimedy. Baiko aphanemaki l'andi baolokutola.

33 Aki wina akitaka nda boshidi bonda botoa, widima okweki na motshi iuma elengi nd'oshidi onda dibvwa; 34 aki wina akitaka nd'oshidi onda dibvwa, Yeso ondilaki lolaka londa boolo mbo; Eloi, Eloi, lama sambakatani? Dikadimola nda botephelo bondiso mbo, Ndjambi enami, Ndjambi enami, we omondudwa sheleko? 35 Bamodi andiyo baolemala ntutama, akiyo wokaka lolaka loiko, baosanga mbo; Lophalaka, andi aeta Eliya. 36 Bomodi ondiyo aoluta diyokola itoto la baana banda bokayi, aoshumyiko nda ishoshongo, aolokaya ina andi dimela ayandi; Loshilamaphele, tongophala nkina Eliya aokoyaka diyophanula.

37 Ko Yeso, akiandi aphaphangwaka la lolaka londa boolo, akendjaki bodimo onandi. 38 La etoo ephanemaki nda etombolelo elatsha ditate diphe ma botsha bond'eko elengi ndi n'ase. 39 Kapita enda basoda onemalaki nd'os'onandi akiandi wenaka mbo; Andi ophaphangwaki shiko, ko awaki, and'osangaki mbo; Soosolo bont'one oki Bona ona Nkumundjeyi. 40 La baimato bakiako, baphala ma itatali; nd'atei andiyo bayaki Madia, bosu Mangadala, la Madia, nyango enda Yakobo la Yose, o la Salome. 41 Aki Yeso wulamaka na Ngalili, iyo bauma baolokambela bolimo, la baimato ankina phala baoyaka l'andi nda Yelushalema.

42 Aki dikolo akitaka, djoi inda wina boiko boki win'onda Diphonga, mbo; Wina bond'oso onda Sabado, 43 Yosefu bosu Alamatiya, bokphulaki onda dimemya, ayaki andi mele nda didila waphemelo ona Ndjambi, oyakaki, aokembya botema bonandi, aoyokenda ele Pilata, aolotsha bodwo bonda Yeso. 44 Pilata ophephaki mbo; Moko, aowa phwaphwa ene? Ko andi aoleta kapitenyi enda basoda, ko aolouwula mbo; Andi aowa elengi? 45 Akiandi wokaka bosako m'ele kapitenyi, andi aolesela Yosefu bodwo. 46 Bonto oiko osombaki etoo enda amerikani enda molongomolongo, aolimola bodwo ma bosongo, la aolomb'oko nda etoo eiko ena molongomolongo, koko aoletsh'oko nda boko bokiandi atshimaka nda dwenga, aokidimola diyoko nda wisho bond'ekundu. 47 Madia, bosu Mangadala, la Madia, nyango enda

Yose, baolena djowa ekiyo wetshakandi.

Tshapita 16

1 Sheko, aki wina bonda Sabado alekaka, Madia bosu Mangadala, la Madia, nyango enda Yakobo, o la Salome, baosomba malasha djoi inda diyokosa bodwo bonandi. 2 N'am'ipupu nda win'ond'oso onda lobingo iyo ayakaki nda ekundu, wina boshila dikya. 3 Ko baoluwulana ayiyo, Bonto onkono aokotokidimolela diyoko ma wisho bond'ekundu? 4 Akiyo akyakephaka, baolena mbo, Diyoko imbokidimolama; ko diko diki diyoko in'onene phala. 5 Iy'aolotshwa nda ekundu, baolena bolangala bonda dwele, udi nda lo londa bolomi, bolotshi etoo enda welo, ko iyo baolekola diphepha la ditongonomwa. 6 An'ondasangelaki mbo; Lototongonomwaki; inyo yasaka Yeso, bosu Nasaleta, bokiyo adjakaka nda bosongo bona ndekesanya. Andi ambetshwa ma bewedi, andi aphoyadi ane; lophalaka etetenyi ekiyo wetshak'andi. 7 Aye, lokendaka inyo loyosangele baeki banandi, o la Petero, mbo; Andi aokenda nd'oso ona inyo na Ngalili; inyo lokenana l'andi mpiko shene ekiandi alosangelaka. 8 La iyo andolaki, baoluta l'iyango m'ekundu. Lolengi londa bophodu lolakata, la iyo atosangela bonto nkula djoi nd'itshina inda iyo baowa la bophodu.

9 Ko akiandi wetshwaka ma bewedi nda wina bonda oso bonda lobingo n'ama ipupu, andi aolenya nd'oso ele Madia, bosu Mangadala, okiandi wimolaka baphopho nsambo m'otema bonandi. 10 Shene andi okendaki diyosangel'aiko baosukama l'andi l'aki la lokesedi nda betema bendiyo, la alelaki. 11 Aki iyo wokaka mbo; And'ayadi la lomo la Madia aoshila yoena, iyo batimedya djoi indiyo. 12 Nd'okongo onda baosi ane andi aolenya bophu onkina ele baphe and'iyo akiyo akendaka nda boswe; 13 ko iyo baoluta diyosangela ankina bosako boiko; aye iyo atimedye nkula iyo. 14 Ko, nd'okongo andi oyatshumyaki ele baeki bonkama la bophoko akiyo wetamakaka nda lotonda; andi aolakutola djoi inda dikodi dindiyo la boolo bond'etema endiyo, l'oloko onda iyo batimedya djoi inda banto baiko baoloena m'okongo onda yetshwa enandi ma bewedi. 15 Ko andi ondasangelaki ayandi, Lokendaka na motshi iumela, lotshangolaka bosako ond'olotshi nd'etongelo euma: bonto bonimedya, boninama mbatisa, andi aokika; aye, aphonimedye, aokophelama. 17 Tolimbitelo tone tokoyela baiko basimedya; iyo baokita baphopho ban'embe nda dina dinami; iyo baokotephela la nemu ind'oto; 18 baokambola ndjwa; ko nkina baokomela ashi ana nyengo, baphongowa: baokaphya ankonyi bakata, la iyo baokangasana.

19 Akiandi atephelaka la iyo shiko, Nkumu Yeso aokolama nda loola, l'aoyulama nda lo londa bolomi lona Nkumundjeyi. 20 La iyo baokenda,

baosambedya bosako bond'olotshi nda bekphulaka beumela la Nkumu akambaki la iyo, shene andi olananganya lolaka la tolimbitelo tolayela.